

Revelation

Deo Ioane Maagai Kapa'ina Epafokia Auga Fouga

1 ¹I'ina puka auga Iesu Kristo kapa'ina epafokia auga fouga. Ega'ina kapa'i auga Deo Iesu Kristo epeniia, ega koa isa kapa'ina emai efua af'a'agamo agemia auga, Deo ega pinauga au'i fepakina'i eoma. Ke Iesu Kristo ega agelo eulaisa, ke agelo faagagai isa ega pinauga auga Ioane i'ina kapa'i epalogo. ²Ke Ioane Deo ega iifa ke Iesu Kristo kapa'ina ko'a eifafoua eisa'i au'i ma'oai papiau maa'iai ko'a auga eifafoua. ³Kaisau Ioane profeta koa emia i'ina iifa'i epapua'i au'i ekuapini'i auga, Deo maagai kapa felo'i eafi'i auga emia. Ke kaisau mo i'ina iifa'i a'o'i kelogoni'i, ke alo'i ko'agai kai'iai kepea au'i, Deo eegai kapa felo'i akeafi'i. Gome i'ina kapa'i fekemia auga kina emai kainagai.

⁴Lau Ioane i'ina malelega lapapua oi Asia agogai iifi e'a imagea gua aumi eemai laulaisa. Lau lamegamega ega koa Deo ufainagai eagu auga, pau eague, ke muni agemai auga, ega gafegafe akaiki'a ke gagao fou fepenimi foagu felo laoma. Ke isa mo laa'i kai, Deo ega Spiritu au'i imagea gua Deo isapu akaiki'a eafia afugai eagu auga agogai keagu au'i isafa gafegafe akaiki'a, ke gagao fou fekepenimi foagu felo laoma. ⁵Ke Iesu Kristo alo ko'agai Deo faugai ko'a mo eifafoua, ke eufai maeai emaunimue auga, ke i'ina agofa'a kini'i elopialaini'i auga isafa gafegafe akaiki'a, ke gagao fou fepenimi foagu felo laoma.

Isa auga alo ko'agai i'a ani'a eani, ke ifagai i'a a'a laomai apala'i ee'iai epapealai'a. ⁶Ke i'a isa ega agofa'a papiau'a, ke ega sakedote epamiai'a, ega koa i'a isa Ama Deo ega pinauga fakapa eoma. I'a Iesu Kristo au akaiki'a, ke isapu inagome auga amapamia aoniamo! Amen.

⁷"Amoisa, Iesu Kristo apuapuai emai,
ke papiau ma'oai maa'iai isa akeisa.

Ke papiau isa imaauga keoga au'i isafa maa'iai isa akeisa.
Ke agofa'a papiau'i ma'oai isa puogai akeapepe.

Iifa gome ega'ina agemia paisa! Amen.

⁸“Lopia Deo kapa ma'oai agekapa'i agekaina auga, ufainagai eagu, pau eaguega, ke muni agemai auga eifa, “Lau auga Alfa, ke Omeka,”^a eoma.

Ioane Maaga Elaulau Iesu Kristo Eisa

⁹Lau Ioane, oi Asia agogai iifi e'a imagea gua aumi aami lamia. Oi lau Iesu Kristo fou amia kainai, fou kai'alaouisa ega agofa'ai agaagu. Ke i'a kai'alaou akiekie, ke gamuga mo aopo. Lau Deo ega iifa, ke Iesu Kristo ko'a eifafoua auga laifafoua puogai, keulaisau ifou mo lalao Patmos keleipuugai. ¹⁰Ke Lopia Iesu keau afagaina kina aga'ogai, Deo ega Spiritu lau alou epogu. Ke lau muniuai aufalao aga'o aina akaiki'a, fi'i a'o koa i'opoga a'o lalogonia. ¹¹Ke isa eifa einaka, “Kapa'ina loisa auga pukai mopapua kai, foulaisa felao Asia agogai iifi e'a imagea gua au'i ee'i. Ega'ina iifi e'a'i au'i auga, Efesus, Smina, Perkamum, Tiatira, Sardis, Filadelfia, ke Laodisia,” eoma.

¹²Ke lau la'afoaipini kaisau enini'ani auga maisa laoma. La'afoaipini aisama, lanepa kepa'afa'i afu'i goldai kekapa'i au'i, au'i imagea gua laisa'i. ¹³Ke ega'ina lanepa'i kepa'afa'i afu'i epo'iai aufalao aga'o, “papiau aumauni gauga,”^b koa i'opoga eapa. Ke isa tiapu ei'iuka auga eake elao ifegai. Ke tiapu goldai kekapa auga olagagai epagai. ¹⁴Ke isa kania, ke fufuga auga sipi faaga puina keloga koa i'opoga, snou koa i'opoga ekelo alogaina. Ke isa maaga alo auga lo eufa emoge eaea akaiki'a ipauma koa i'opoga emia. ¹⁵Ke isa ife auga, auli lo e'isapu alogaina auga logai keuma epo emaefa kai, kepakuma ekimage alogaina auga koa i'opoga emia. Ke isa enini'ani aina auga, fei epiau fa'i'i fopai eauga a'o koa i'opoga emia. ¹⁶Ke isa ima kainai mi'im'i imagea gua eafii'i. Ke pipaini a'ifaga apie apie kepaaka eako alogaina auga isa akegai epealai. Ke isa kua maaga auga, kina ea felo alogaina eaea akaiki'a ipauma emia koa i'opoga emia.

¹⁷Ke lau isa laisa aisama, lau lamae koa i'opoga la'uulai ife fo'inai. Ega aisama isa ima kaina lau faagauai eogeaua kai eifa einaka, “Folomani'i. Lau auga ufaimaaga au, ke muniai ipauma au. ¹⁸Lau auga Mauni Inagome au. Lau lamae kai lamaunimue laague aoniamo moisa. Ke papiau akemae, ke ipeli^c akelao auga isapuga lau eeuai ekae.

¹⁹“Ega puo pau kapa'ina emia auga, ke muni kapa'ina agemia auga loisa'i au'i fopapua'i. ²⁰Mi'im'i imagea gua imau kainai laafi'i au'i, ke lanepa ipaфа'a'i afu'i imagea gua goldai kekapa'i loisa'i au'i e'i ogefake iina koa: Mi'im'i imagea gua au'i auga, iifi e'a au'i imagea gua au'i, e'i

^a 1:8 Grik malagai malele eufai auga Alfa, ke malele muniai ipauma auga Omeka. Ega'ina auga isa kapa ma'oai e'inisa auga, ke kapa ma'oai isa faagagai akefua.

^b 1:13 Daniel 7:13 ^c 1:18 Grik malagai, ‘Hades’

iifa ipapea au'i.^d Ke lanepa ipafa'a'i au'i imagea gua au'i auga, iifi e'a'i au'i imagea gua au'i.

Efesus Iifi E'a Papiau'i E'i Iifa

2 ¹Isa lau epainiau pugu einaka, “Efesus iifi e'a papiau'i e'i iifa ipapea auga^e ega iifa ilina fopapua:

“I'ina auga, milimi'i imagea gua ima kaina kainai eafii'i auga, ke lanepa ipafa'a'i afu'i goldai kekapa'i, au'i imagea gua epo'iai epealao epeamai auga kapa'ina eifania auga fouga. ²Lau oi kapa'ina lokapa'i auga, ke lopinauga kapula, ke kapa'ina faagamuai kemia ganinagai, gamu'i mo looponi'i auga lalogo. Ke oi au apala'i au'i aloafi'i fou aloagu, ke kaisau apostolo laa'i kai ifo'i apostolo keomai'i au'i lo'opoi'i, ke issa pifoge au'i auga lokapulaisa auga isafa lalogo. ³Oi ega'ina mo alokapaisa kai, oi lau akau faugai kina apala'i lokaifaini'i mo ganinagai, oi aloafipugu kai, alomu loafiapia mo gamu'i mo loponi'i auga isafa lalogo.

⁴Kai lau oi ilina auga mo alokapa felo auga anina alaani. Oi alomu ko'agai lau aniu loani kakaua auga, pau lopua'afuga. ⁵Ega puo oi kapai lo'ualai loake auga moopolaga! Oi emu laomai apala'i foumakalaini'i kai, kapa'ina lokapa kakau'i au'i fokapa'i pugu. Kai oi emu laomai apala'i afoloumakalaini'i koa aisama, lau alafai oi emu lanepa ipafa'a afuga alaafi'aua. ⁶Kai oi laomai felo aga'o eemuai ekae lokapa. Ega'ina auga oi Nikolaitan^f papiau'i kapa'ina kekapa'i au'i alomi ko'agai ani'i aloani. Ega koa i'opoga mo, lau isafa alou ko'agai ega'ina lao'i mai'i ani'i alaani.

⁷Kaisau aina ekae auga, Deo ega Spiritu iifi e'a ee'iai kapa'ina eifania auga aina felogo. Ke kaisau ega pak'o'ai laomai apala'i epalutini'i auga, lau isa alalogoaina, Deo ega agofa'ai au puaga mauni epipeni auga anina ageania.

Smina Iifi E'a Papiau'i E'i Iifa

⁸Isa lau epainiau pugu einaka, “Smina iifi e'a papiau'i e'i iifa ipapea auga ega iifa ilina fopapua:

“I'ina iifaga auga, isa ufaimaaga emia auga, ke muniai ipauma emia auga, ke emae kai emaunimue auga ega iifa. ⁹Lau oi emu kiekie ke ulalu fou lalogo. Kai lau laopolaga oi pa'amu'amu aumu laoma. Papiau isa'i ifo'i Iudea papiau'i keoma'i au'i, oi eemuai keifa apala auga lalogo. Isa auga Iudea papiau'i laa'i kai, Satani ega la'afou

^d 1:20 Grik malagai isafa agelo keoma. ^e 2:1 Grik malagai isafa agelo keoma. Ke verse 8, 12, ke 18 alogai isafa ekae. ^f 2:6 I'ina auga papiau laomai apala'i i'oi'i l'oi'i kekapa'i au'i e'i la'afou aga'o.

papiau'i. ¹⁰ Oi faagamiai kapa'ina akemia agokiekie auga mani'il'i folopa'aua. Lau lapainio, oi epomiai isami Satani ga'opoimi ageoma, tipulai agepaaguimi. Ke kina ou'aga alogai oi agokiekie alogaina. Kai oi emi mae kuagai ganinagai, emi pako'a lau eeuai fooge paisa. Ega koa agokapa aisama, lau oi afu felo ipauma alapenimi, agu pagai maunina agoafia.

¹¹ Kaisau aina ekae auga, Deo ega Spiritu iifi e'a ee'iae kapa'ina eifania auga aina felogo. Ke kaisau ega pako'ai laomai apala'i epalutini'l'i auga, laomai apala'i kekapa'i au'i muni mae gua akepamia aisama, isa faaga ala aga'o afaeoma.

Perkamum Iifi E'a Papiau'i E'i Iifa

¹² Isa lau epainiau pugu einaka, "Perkamum iifi e'a papiau'i e'i iifa ipapea auga ega iifa i'ina fopapua:

"I'ina iifaga auga, isa pipaini a'ifaga apie apie kepaaka eako alogaina auga eafia auga ega iifa. ¹³ Oi kapai loague auga lau lalogo. Oi auga Satani eaguagu afugai loague. Kai oi alomu ko'agai lau akau loafiapia. Ke oi emu taoni, Satani eagu afugai papiau Antipas alo ko'agai lau fou ko'a mo eifafoua auga keaupugua kinagai mo ganinagai, oi lau lopako'aniau auga alopuniaiaina. ¹⁴ Kai lau oi i'ina auga mo alokapa felo auga anina alaani. Papiau isa'i oi epomiai Balaam ega pamalele keafia muninai kepea au'i keague. Balaam auga Balak epamalelenia, Israel papiau'i epaafil'i fo'ama deo pifoge'i kepa'a peni'l'i au'i keanii'l'i, ke amage lao'i mai'l'i apala'i kekapai'i. Ke ega'ina laoga maina auga isa ife'i feke'anina feke'uulai auga kapa emia. ¹⁵ Isa ega koa kekapa koa i'opoga, oi epomiai papiau isa'i Nikolaitan papiau'i e'i pamalele muninai kepea au'i keague. ¹⁶ Ega puo oi emi laomai apala'i amoumakalaini'i. Kai oi ega koa afolokapa koa aisama, lau fiakoa mo oi eemi alafai, ke lau akeuai pipaini a'ifaga epealai auga a'ifagai isa fou agapipaini.

¹⁷ Kaisau aina ekae auga, Deo ega Spiritu iifi e'a ee'iae kapa'ina eifania auga aina felogo. Ke kaisau ega pako'ai laomai apala'i epalutini'l'i auga, lau mana laogefake'i au'i alapenia ageania. Ke lau isa kepo keloga isafa alapenia. Ke kepo laagai aka mamaga ipapua emia auga kai aga'o i'oina afaelogo kai, kaisau ega'ina kepo eafia auga mo agelogo.

Tiatira Iifi E'a Papiau'i E'i Iifa

¹⁸ Isa lau epainiau pugu einaka, "Tiatira iifi e'a papiau'i e'i iifa ipapea auga ega iifa i'ina fopapua:

"I'ina iifaga auga, isa Deo Gauga maaga alo lo eufa emoge eaea akaiki'a ipauma emia koa i'opoga auga, ke isa ife auli lo e'isapu

alogaina auga logai keuma epo emaefa kai, kepakuma ekimage alogaina auga koa i'opoga emia auga ega iifa. ¹⁹Lau oi kapa'ina lokapa'i auga, ke oi alomu ko'agai Deo ke papiau anil'i loani auga, ke e'i pinauga lokapa'i au'i, ke emu pako'a Deo eegai looge auga, ke kapa'ina mo faagamuai kemia ganinagai, alomu loafiapia mo, gamu'i mo loponi'i auga lalogo. Ke pau kapa'ina lokapa auga, kapa'ina lokapa kakaua auga eka'egaina auga isafa lalogo.

²⁰Kai lau oi i'ina auga mo alokapa felo auga anina alaani. Oi Jesebel ifo eifaga profeta papiega eoma auga loafia fou oagu. Isa ega pamaleleai lau e'u pinauga au'i, epapea me'e'i kelao amage koa lao'i mai'i apala'i kekapai'i, ke fo'ama deo pifoge'i kepa'a peni'i au'i fo'ama'i keanii'i. ²¹Lau isa kina lapenilia, amage koa lao'i mai'i apala'i ma'oai ekapai'i au'i feumakalaini'i laoma. Kai isa ega koa fekapa auga anina aeani. ²²Moisa! Lau isa kiekie petinai alapiuaua. Ke kaisau isa fou amage koa lao'i mai'i apala'i ma'oai kekapai'i au'i, e'i laomai apala'i afakeumakalaini'i koa aisama, kiekie akaiki'a ipauma alapeni'i. ²³Lau kai mo isa ega laomai muninai kepea gauga kemia au'i alaaupugui'i. Ega aisama iifi e'a ma'oai lau auga papiau alo'i ke opola'i laisa lakapulaisa auga akelogo. Ke lau oi aga'o aga'o kapa'ina okapa'i au'i faaga'i afa alapenimi. ²⁴Kai oi Tiatira papiaumi epomiai isami, papie ega'ina ega pamalele aloafia kainai alopea aumi, ke Satani ega ogefake kapa'i keoma au'i alomaleleaini'i aumi kapa aga'o meauga afalapenimi. ²⁵Kai pau auga kapa'ina oafil'i auga foafil'i mo felao lau alafai kinagai kai.

²⁶Ke kaisau ega pako'ai laomai apala'i agepalutini'i auga, ke isa lau kapa'ina anina laani auga agekapa'i mo agelao kina fuagai aisama, lau isa agofa'a fosouga papiau'i fe'ima'i auga isapuga alapenia. ²⁷Ke isa isapu ageafia auga gouga aulina ageafia agofa'a papiau'i age'ima'i ke oga koa i'opo'i ageaupea'i. Ega'ina agemia auga, lau Amau eegai isapu laafia koa i'opoga, isa isafa isapu ageafia ega koa agekapa. ²⁸Ke lau isa amagai mi'imilina eaea akaiki'a auga alapeni'i. ²⁹Kaisau aina ekae auga, Deo ega Spiritu iifi e'a ee'iae kapa'ina eifania auga aina felogo."

Sardis Iifi E'a Papiau'i E'i Iifa

3 ¹Isa lau epainiau pugu einaka, "Sardis iifi e'a papiau'i e'i iifa ipapea auga^g ega iifa i'ina fopapua:

"Iina iifaga auga, isa Deo ega spiritu au'i imagea gua, ke mi'imil'i imagea gua eafil'i auga ega iifa. Lau oi kapa'ina lokapa auga lalogo. Papiau ma'oai kelogo felo oi auga loagu felo keoma kai, oi lomae

^g 3:1 Grik malagai auga agelo isafa keoma. Verse 7 ke 14 isafa alogai ekae.

efua koa i'opoga. ²Ega puo mo'ue pugu! Ke oi eemuai kapa'ina ekae afa'agamo agemae auga mopakapulania. Gome lau e'u Deo maagai oi emu pinauga opaina auga alaisa. ³Ega kainai kapa'ina loafia, ke a'o lologonia auga foopolani'i faefuafua. Ke ega'ina muni'iai mopea, ke emu laomai apala'i founmakalaini'i. Kai oi afolo'ue pugu koa aisama, lau painao au koa alafai, ke lau kina maaga kapagai eemu alafai auga afolologo.

⁴Kai Sardis taoninai oague aumi epomiae papiau isa'i mo afe'i tiapuga aeofu koa i'opoga, e'i laomai apala aemia. Ega'ina au'i laomai felo'i tiapu keloga koa i'opoga au'i ake'i'uaka'i lau fou agapea. Gome isa auga Deo eisa'i ekainia au'i. ⁵Kaisau ega pak'o'ai laomai apala'i agepalutini'i auga, ega'ina au'i koa i'opoga, ega laomai felo auga, afe tiapuga keloga koa i'opoga agei'uuka. Ke lau isa aka agu pagai maunina feafia auga pukagai kepapua auga afala'ina. Kai lau Amau, ke ega agelo fou ago'iai isa aka alaifafoua. ⁶Kaisau aina ekae auga, Deo ega Spiritu iifi e'a ee'iai kapa'ina eifania auga aina felogo."

Filadelfia Iifi E'a Papiau'i E'i Iifa

⁷Isa lau epainiau pugu einaka, "Filadelfia iifi e'a papiau'i e'i iifa ipapea auga ega iifa i'ina fopapua:

"I'ina iifaga auga, isa alo elolofa auga, ke iifa ko'a inagome auga, ke Davide ega isapu akaiki'a pa'afina fepaagalaisa isapuga eafia auga, ega iifa. Isa kapa'ina epaagalaisa auga kai aga'o agekupuga afaekaina. Ke kapa'ina ekupuga auga kai aga'o agepaagalaisa afaekaina. ⁸Lau oi kapa'ina lokapa auga lalogo. Moisa, lau e'u pinauga fokapa auga pa'afina eagalai umamo kai aga'o agekupuga afaekaina auga oi agomiae laogeisa. Oi emu pak'o'a kapulaga afa'agamo eemuai ekae auga mo ganinagai, oi lau e'u iifa muninai lopea paisa, ke lau akau alopuniaiaina auga lalogo. ⁹Satani ega la'afou papiau'i isa'i, Judea papiau'i laa'i kai kepifoge ifo'i Judea papiau'i keoma'i au'i oi alapenio. Moisa, lau isa alapapea'i ega koa akefai oi ifemu fo'inai fekeomukipo, ke lau alou ko'agai oi animu laani auga isa fekelogo laoma. ¹⁰Oi lau e'u iifa kapula'i, papiau gamuga mo fekeopo laoma au'i iifa'i muni'iai lopea. Ega kainai i'opo kina maaga agemai agofa'ai keague au'i ma'oai fe'opo'i ageoma agemai agofa'a fofouga alogai aisama, lau oi i'opo ega'ina eegai alapapealaiso.

¹¹Lau afa'agamo alafai. Oi eemuai kapa'ina kekae au'i foafapi'i mo. Ega koa kai aga'o oi afa akaiki'a kraon koa i'opoga foafia auga faefanio. ¹²Kaisau ega pak'o'ai laomai apala'i agepalutini'i auga, lau e'u Deo ega e'a'i ipalao kapula ipauma alapamia. Ke isa Deo ega e'a afaepuapua'afuga. Ke lau isa faagagai e'u Deo aka alapapua. Ke lau

e'u Deo ega taoni, Ierusaleme mamaga, ufaif lau e'u Deo eegai ageake agemai auga aka isafa isa faagagai alapapua. Ke lau akau mamaga isafa, isa faagagai alapapua. ¹³Kaisau aina ekae auga, Deo ega Spiritu iifi e'a ee'iai kapa'ina eifania auga aina felogo."

Laodisia Iifi E'a Papiau'i E'i Iifa

¹⁴ Isa lau epainiau pugu einaka, "Laodisia iifi e'a papiau'i e'i iifa ipapea auga ega iifa i'ina fopapua:

"Iiina iifaga auga, isa Iifa Ko'a Inagome Auga,^h ke papiau fekepakoa'ania, ke alo ko'agai iifa ko'a mo eifafoua auga, ke Deo ega pagama kapa'i ma'oai e'imai' Lopiaga auga ega iifa. ¹⁵Lau oi kapa'ina lokapa auga lalogo. Oi alo'isapu ke alokeke'a. Lau anina laani auga, oi ipuainagai folomia kai kapa aga'omo fomia laoma. ¹⁶Ega puo oi alo'isapu alogaina, ke alokeke'a alogaina kai, ipuainagai mo kainai, lau akeuai afa'agamo oi ala'upelaiso. ¹⁷Oi ifomu foumu loifania loinaka, 'Lau lapa'amu'amu lalaoina, ke pau lapa'amu'amu efua, ke lau kapa aga'o eegai alaafi'afu,' looma. Kai oi lolifu afe'ai, papiau oi keisao guamu keania, maamu ekimi'i, ke faagamu maini koa i'opoga loulalu alogaina auga oko alologo. ¹⁸Lau oi magogomu laauga, lau eeuai gold lo e'isapu alogaina auga logai keuma epo emaefa kai, gold ko'a ipauma mo eka auga fo'afa, ega koa oi fopa'amu'amu laoma. Ke afemi tiapu'i kelo'i fo'afa'i foi'iuka'i, ega koa oi faagamu maini meagaina lopa'aua auga fokaisapua. Ke maamu mulamula fo'afa maamuai fooge, ega koa afu foisa laoma. ¹⁹Lau auga kaisau alou ko'agai anina laani auga lalina, ke lapaikifania keaga felogai lapapea. Ega puo oi kapa'ina lokapa auga alomu ko'agai fokapa, ke emu laomai apala foumakalaini'i. ²⁰Moisa! Lau pa'afi akegai laapae pa'afi la'inipa. Aufalao aga'o lau ainau agelogo, ke pa'afi agepaagalaisa koa aisama, lau alakoko alalao isa fou agaaniani. Ke isa isafa lau fou agaaniani.

²¹Kaisau ega pakoa' ai laomai apala'i agepalutini'i auga, lau isa isapu alapenia fou kaimaisalao e'u aguagu afugai agaagu. Ega'ina auga lau laomai apala'i lapalutini'i, Amau ega aguagu afugai laaguega koa i'opoga mo agemia. ²²Kaisau aina ekae auga, Deo ega Spiritu iifi e'a ee'iai kapa'ina eifania auga aina felogo."

Ufaif Deo Ega Aguagu Afuga

4 ¹Isa ega'ina eifani'i efua afegai, lau maau elao pugu. Moisa! Ega aisama lau ufaif pa'afi aga'o eagalai eka laisa. Ke aufalao aga'o aina fi'i koa i'opoga enini'ani kaukau aina lalogo auga eifa einaka,

^h 3:14 Grik malagai, "Amen."

“Mo'agaukae mai inae. Ke lau i'ina kapa'i akemia afegai, kapa'ina muni fekemia auga alapakinaiso,” eoma. ²Ega aisama fiakoa mo lau alou Deo ega Spiritu epogu. Moisa! Ega aisama ufaí aguagu afuga eka, ke aufalao aga'o egal'ina afugai eagu laisa. ³Ke egal'ina papiauga egae eagu auga, iisa kepo pitoga, afa akaiki'a ipauma, ke kepo i'oina aga'o faaga egegefa auga koa i'opoga. Ke ananati auga isa eagu afuga eailofe, ke iisa auga kepo afa akaiki'a ageage auga koa i'opoga.

⁴Ke isa eagu afugai auga, aguagu afu'i ma'oai mo 24 Deo ega aguagu afuga kekalofe. Ke au akaiki'a'i au'i 24 ufaí keague au'i ma'oai afe'i tiapu'i kelo'i ke'iuka'i egal'ina afu'i iai keagu. Ke kin kania'iai kraon keogeoge koa i'opoga, goldai kekapa auga isa kania'iai eka. ⁵Ke Deo eaguagu afuga faagagai kimage eafi epealai, ke ufa eaunia a'o, ke a'oa'o akaiki'a emia emai. Deo ega aguagu afuga agogai, lanepa imagea gua keaga keka. I'ina au'i auga, Deo ega spiritu imagea gua au'i. ⁶Ke Deo ega aguagu afuga agogai auga, a'u kai kalati koa i'opoga, agaisa pagainia agekaina auga isafa eka.

Ke Deo ega pagama kapa'i maa'i maunina au'i pani, ago'iai ke muni'iai maa'i mo efai elaoaina au'i, ipuainagai Deo eaguagu afuga keagu lofe. ⁷Pagama kapa'i ega'ina epo'iai eufai auga, laion koa iisa. Ke isa muninai auga, polomakau koa iisa. Ke pagama kapa oiso auga kua maaga papiau aumauni koa i'opoga. Ke pani auga, paili egopo auga koa iisa. ⁸Pagama kapa'i ega'ina aga'o aga'o pani'i ma'oai mo imagea. Ke faaga'i fofouga auga maa'i maini efai elaoaina, ke pani'i papagai ganinagai, maa'i maini efai elaoaina. Ke isa gapi gani Deo keifagaina aefuafua:

“Lopia, Deo kapa ma'oai agekapa'i agekaina auga,
ufainagai eagu auga, pau eague auga, ke muni agemai auga,
Alo Elolofa, ke Alo Elolofa, ke Alo Elolofa,” keoma.

⁹Ke pagama kapa'i au'i pani, Deo ega aguagu afugai eagu auga ke eague aoniamo auga keplopiania, au akaiki'a kepamia ke tenkiu kepenia. ¹⁰Isa ega koa kekapakapa kai, au akaiki'a'i au'i 24 ufaí keague au'i, Deo ega aguagu afugai eagu auga agogai keomukipo ke eague aoniamo auga keau afagaina. Ke isa kania'iai kraon eka auga keafia ago'iai kepiugalao kai, iina keifa oma keinaka:

¹¹“Emai Lopia, ke emai Deo keplopianio, au akaiki'amu kepamiaiso,
ke isapu akaiki'a aumu kepamiaiso auga ekainia,
gome oi kapa ma'oai lopagama'i.

Ke oi emu logoai kapa ma'oai kegama, ke keague, ke kekae,” keoma.

Puka Ke Sipi Gauga Fou

5 ¹Egae kai Deo ega aguagu afugai eague auga ima kaina kainai puka apie apie malele kepapua, ke ipaafiapina kapa'i ma'oai imagea gua kepaafiapia laisa. ²Ke agelo isapu akaiki'a auga aina akaiki'agai iina eifa

oma auga lau laisa: "Kaisau puka kepaafiapia kapa'i ageafilai'i, ke ega'ina puka agepaagalaisa agekaina?"³ Kai ufa, o aagoai, o aagoa papagai keague au'i aufalao aga'o ega'ina puka fepaagalaisa, o alo feisa auga laa'i.⁴ Ke kai aga'o ega'ina puka fepaagalaisa, o alo feisa fekaina auga akekapulaisa puo, lau laapepe alogaina.⁵ Ega aisama au akaiki'a'i au'i 24 ufa keague au'i aga'o lau epainiau einaka, "Foloapepe! Moisa. Laion Juda ikupugai, Davide okogai emai, au akaiki'a auga ega ou au'i ma'oai epalutini'i efua. Ega puo isa puka, ke puka ipaafiapina kapa'i imagea gua au'i agepaagalai'i agekaina," eoma.

⁶ Ke isa eaguagu afugai, pagama kapa'i maa'i maunina au'i pani, ke au akaiki'a'i ufa keague au'i fou keagu lofe auga, ipuainagai Sipi Gauga eapa laisa. Isa iisa auga keaupugua koa i'opoga. Ke isa pa'o imagea gua, ke maaga isafa imagea gua. Ke maaga imagea gua auga Deo ega spiritu au'i imagea gua eulai'i agofa' fofouga kelao au'i.⁷ Sipi Gauga ega'ina emai Deo ega aguagu afugai eague auga, ima kainai puka ega'ina eafia.⁸ Ke eafia aisama, pagama kapa'i maa'i maunina au'i pani au'i, ke au akaiki'a'i ufa keague au'i 24 au'i fou Sipi Gauga agogai keomukipo. Ke au akaiki'a'i ufa keague au'i aga'o aga'o harpⁱ keafii'i, ke liti goldai kekapa'i alo'ai mulamula foga felo kepogu au'i keafii'i. Mulamula foga felo ega'ina auga, Deo ega papiau e'i megamega.⁹ Ke iifi mamaga keifinia keinaka:

"Oi auga, puka ipaafiapina kapa'i,

ke puka ega'ina aloafia alopaagalaisa agekaina aumu.

Gome oi keaupuguiso,

ke ifamuai ago aga'o aga'o papiau'i,

ke ikupu aga'o aga'o,

ke mala i'oi'i i'oi'i ma'oai alo'ai papiau lo'afai'i Deo eega lolaoaini'i.

¹⁰ Ke oi isa emu agofa'a papiau'i,

ke emu sakedote lopamia'i,

i'a a'a Deo ega pinauga fekekapa looma.

Ke isa ma'oai agofa'a fofouga ake'ima."

¹¹ Egae kai lau maau elao, ke agelo ealogai alogaina agapaauni'i afaekaina au'i aina'i lalogonia. Ke agelo ega'ina au'i, Deo ega aguagu afugai eagu afugai pagama kapa'i, ke au akaiki'a'i ufa keague au'i fou keapa lofe'i.¹² Ke agelo ega'ina au'i keagaga keinaka:

"Sipi Gauga keaupugua auga,

isapu, pa'amu'amu, ikifa ke kapula feafia auga ekainia.

Ke papiau isa kepalopiania,

ke au akaiki'a kepamia, ke keifagaina auga ekainia!"

¹³ Egae kai lau pagama kapa'i ma'oai, ufa, aagoai, a'isa papagai, a'uai, ke kapa ma'oai egae kekae au'i iina keifa oma aina'i lalogonia:

ⁱ 5:8 I'ina kapa auga kita koa i'opoga mai'ufe kepa'opuania.

“Kapa ma'oai Deo ega aguagu afugai eague auga ke Sipi Gauga auga fou, fekeifagaini'i, fekepalopiani'i, au akaiki'a'i fekepamia'i, ke isapu inagome au'i fekepamia'i aoniamo!”

¹⁴Ega aisama pagama kapal'i maa'i maunina au'i pani au'i keifa keinaka, “Amen,” keoma. Ke au akaiki'a'i ufae keague au'i keomukipo isa keau afagaini'i.

Puka Ipaafiapina Kapa'i Imagea Gua Au'i

6 ¹Egae kai lau Sipi Gauga ega'ina puka ipaafiapina kapa'i imagea gua au'i aga'o epaagalaisa auga laisa. Ega aisama pagama kapal'i maa'i maunina au'i pani epo'iai aga'o aina ufa eauga koa i'opoga auga eifa, “Mai,” eoma a'o lalogonia. ²Ke maau elao aisama, moisa oti keloga laisa! Ke oti laagai eaguka auga, imagai afeau ke kin kania'iai kraon keoge auga kepeniia. Ke isa otiai eaguka, epealai elao ega koa ega ou au'i ma'oai fepalutini'i eoma.

³Ke Sipi Gauga puka ipaafiapina kapa gua auga epaagalaisa aisama, pagama kapa gua auga eifa einaka, “Mai,” eoma aina lalogonia. ⁴Ega aisama oti i'oina aga'o pitoga emai. Ke oti laagai eaguka auga, isapu kepeniia, aagoai gagao feafani'i, isa ifo'i mo fekeupugu'i eoma. Ke isa ifani a'lifaga akaiki'a auga kepeniia.

⁵Ke Sipi Gauga puka ipaafiapina kapa oiso auga epaagalaisa aisama, pagama kapa oiso auga eifa einaka, “Mai,” eoma aina lalogonia. Ke maau elao aisama, moisa, oti umuga laisa! Ke oti ega'ina laagai eaguka auga, kapa aga'o auni'i e'i meau i'opoga mo kegaisa keoma auga sikele'i eafii'i laisa. ⁶Ega aisama lau pagama kapal'i epo'iai aufalao aga'o koa aina iina eifa oma auga aina lalogonia: “Palafa pute e'ele aga'omo^j auga, kina aga'omo pinauga afa. ^kKe barley pute'i e'ele'i oiso auga, kina aga'o pinauga afa. Ke gakugaku oilina, fino fou folopalifu'i!” eoma.

⁷Ke Sipi Gauga puka ipaafiapina kapa pani auga epaagalaisa aisama, pagama kapa maaga maunina pani auga eifa, “Mai,” eoma aina lalogonia. ⁸Ke maau ekiakae aisama, moisa oti iisa eogogo auga laisa! Ke oti ega'ina laagai eaguka auga, aka Mae, ke Ipeli^l isa muninai mo elao. Isa agofa' fofouga alogai ago pani koa i'opoga auga, isa ago ega'ina pani epo'iai aga'omo feke'ima auga isapuga keafilia. Ega koa ago ega'ina papiau'i pipaini a'ifagai, mageai, isafa akaiki'a'i, ke ago alo a'o a'i'i, isa fekeupugu'i keoma.

⁹Ke isa puka ipaafiapina kapa ima auga epaagalaisa aisama, lau a'o Deo kepa'a penia afuga papagai papiau lalau'i keagu laisa*'i*. Isa auga Deo ega iifa kainai keagu, ke alo'i ko'agai Deo ega iifa ko'a kepamia kainai

^j 6:6 Grik malagai, koiniks. I'ina auga kilo aga'omo koa i'opoga. ^k 6:6 Grik malagai, denari aga'omo. ^l 6:8 Grik malagai, Hades.

papiau isa keaupugu'i. ¹⁰ Isa aina'i akaiki'agai keagaga keinaka, "Lopia, Isapu akaiki'a, alo lolofa, ke iifa ko'a inagome aumu, kina epo pika agelao kai, oi agofa'ai keague au'i e'i laomai felo, o apala afa alopeni'i, ega koa lai ifamai afa alooge?" keoma. ¹¹ Ke ega'ina papiau'i lalau'i aga'o aga'o tiapu keloga kepenii'i keafii'i. Ke kepaini'i afa'agamo feke'ima, felao papiau isa koa i'opo'i, Deo ega pinaugakekapa au'i, ke aa'i aki'i Kristiano papiau'i isa koa i'opo'i akeauptugu'i au'i, Deo ega logoai papiau pika koa i'opo'i akemae eoma auga akemae afehai kai keoma a'o kelogonia.

¹² Ke Sipi Gauga puka ipaafiapina kapa imagea auga epagalaisa laisa. Ega aisama kafokau akaiki'a ipauma emai. Ke kina umuga ipauma emia, iisa ofuofu tiapuga a'o faaga umuga puinai kekapa auga koa i'opoga emia. Ke gafa fofouga iisa i'oina emia, ifa pitoga koa i'opoga emia. ¹³ Ke ameku akaiki'a emai aisama, au aka fik anina maisa epua'i ke'uulai koa i'opoga, ufa mi'imi'i ke'uulai keake aagoai. ¹⁴ Ke puka kepaofe koa i'opoga, ufa isafa ega koa emia elao laa'i emia. Ke aagoai iku ma'oai, ke keleipua ma'oai ifo'i afu'iai keka auga keafilai'i.

¹⁵ Ega'ina alogai aagoai kin au'i, lopia au'i, ifani au'i e'i au akaiki'a'i au'i, pa'amu'amu au'i, kapula maa'i au'i, ke kala'afi ma'oai, ke papiau aage'i ma'oai kelao iku ine'iai, ke ikuai fopa epo'iai kei'ofake. ¹⁶ Ke isa iku fopa fou kepaini'i keinaka, "Lai laamaisai amou'alai, ke Deo ega aguagu afugai eague auga, ke Sipi Gauga ega guakupu eegai amopakaisapumai! ¹⁷ Gome isa e'i guakupu kina akaiki'a auga emai efua, ke kaisau isa e'i guakupu alogai ageaguka agekaina?" keoma.

Deo Papiau Faaga'iai Maka Eoge Au'i

7 ¹Ega'ina afehai lau agelo pani, aagoa kiuga paniai keapa laisa'i. Isa ameku pani aagoa kiuga paniai kepua kemai au'i keafiai'i, ega koa ameku aga'o faelao aagoa, a'u, ke au aga'o faepua keoma. ² Egae kai lau agelo aga'o kina e'agau afugai emai auga, Deo eague aoniamo auga, ega maka eafia emai laisa. Ke isa eagaga agelo pani aagoa, ke a'u fou fekepalifua isapuga keafiai au'i epaini'i einaka: ³ "Oi aagoa, o a'u, o au folopalifu'i felao lai, i'a a'a Deo ega pinauga au'i paku'iai maka faoge kai," eoma. ⁴ Egae kai lau papiau pika paku'iai maka isoge emia auga a'o lalogonia. Ega'ina papiau'i auga Israel ikupuga alogai papiau ma'oai 144,000 auga inamo'e'i:

- ⁵ Juda ikupugai 12,000,
- Ruben ikupugai 12,000,
- Gad ikupugai 12,000,
- ⁶ Asher ikupugai 12,000,
- Naftali ikupugai 12,000,
- Manaseh ikupugai 12,000,
- ⁷ Simion ikupugai 12,000,

Lefi ikupugai 12,000,
 Isaka ikupugai 12,000,
⁸ Sebulun ikupugai 12,000,
 Iosepa ikupugai 12,000,
 Benjamin ikupugai 12,000, paku'iai maka keogeisa.

Agofa'a Fofouga Kemai Au'i Kela'afou

⁹ Ega'ina afegai maau elao aisama, moisa, lau la'afou akaiki'a ipauma kai aga'o agepaauga afaekaina auga laisa. Ega'ina la'afouga alogai, agofa'a alogai, ago ma'oai papiau'i, ikupu ma'oai papiau'i, ke papiau faaga'i i'oina i'oina ma'oai, ke mala ma'oai papiau'i kemai, Deo ega aguagu afuga, ke Sipi Gauga fou ago'iai keapa. Ke isa tiapu kelo'i kei'iuka'i, ke ima'iai pa'ogo keafii'i. ¹⁰ Ke aina'i akaiki'agai keagaga keinaka:

“Papiau kania'i isagamauga auga i'a a'a Deo,
 ega aguagu afugai eague auga,
 ke Sipi Gauga fou apu'i,” keoma.

¹¹ Ke agelo ma'oai Deo ega aguagu afuga, au akaiki'a'i ufaik eague au'i, ke pagama kapa'i maa'l maunina au'i pani au'i fou keapa lofe'i. Ke isa Deo ega aguagu afuga agogai keomukipo, ke Deo keau afagaina. ¹² Ke keifa keinaka:

“Amen!

I'a a'a Deo,

fekeifagaina, fekepalopiania, au akaiki'a fekepamia,
 ikifa inagome auga, isapu inagome, kapula inagome auga fekepamia,
 ke tenkuu fekepenia aoniamo.

Amen!”

¹³ Ke au akaiki'a'i ufaik eague au'i aga'o lau epa'ani peniau einaka, “I'ina au'i tiapu kelo'i kei'iuka'i au'i kaisau ke kapai kemai?” eoma.

¹⁴ Ke lau iifa lapamue lainaka, “Au akaiki'a aumu, oi lololo,” laoma. Ke isa einaka, “I'ina papiau'i au'i, kiekie akaiki'a'i alo'iai kepealai au'i. Ke isa Sipi Gauga ifagai e'i tiapu keikuisa keloga kepamia au'i. ¹⁵ Ega puo,

“isa Deo ega aguagu afuga agogai keague,
 ke gapi gani Isa ega e'ai keau afagaina aefuafua.

Ke Deo ega aguagu afugai eague auga,
 isa e'ima'i auga gouga
 palai kania'i laagai agela'a pagainia.

¹⁶ Ke isa inae'i afaekimu,
 ke aiso'i afaekupu pugu.

Ke kina isapugai isa afaegaga kalani'i.

Ke isapu apala aga'omo ganinagai, isa afaegaga'i.

¹⁷Gome Deo ega aguagu afuga

ipuainagai ipauma auga, Sipi Gauga eagu,
 isa e'i pipi i'ima auga koa i'opoga
 agemia age'ima'i,
 ke agepapea'i agelaoaini'i
 fei e'uki mauni mamaga epipeni auga
 feinai agepapealai'i.

Ke Deo isa maa'iai maa'l'i iuga ma'oai agefaini'i," eoma.

Puka Ipaaifiapina Imagea Gua Auga Ke Liti Goldai Kekapa Auga

8 ¹Ega'ina afegai Sipi Gauga puka ipaafiapina kapa imagea gua auga epaagalaisa aisama, ufa 30 minutes koa i'opoga a'oa'o aga'o aemia.
²Ke agelo au'i imagea gua Deo agogai keapa au'i, fi'i ma'oai mo imagea gua kepenii'i keafii'i laisa'i.

³Ke agelo i'oina aga'o, mulamula foga felo keuma'i kapa goldai kekapa eafia auga, emai Deo amu kepala penia afugai eapa. Isa mulamula foga'i felo'i ma'o kepenia eafii'i, ega koa Deo ega papiau ma'oai e'i megamega fou feafii'i Deo fepa'a penia eoma, elao Deo agogai amu Deo kepa'a penia afuga goldai kekapa auga afugai eapa. ⁴Ega aisama mulamula foga felo auga akuga, ke Deo ega papiau e'i megamega fou agelo imagai ega'ina mulamula euma kapagai auga, kepealai ke'agaukae kelao Deo agogai.
⁵Ke agelo amu Deo kepa'a penia afugai lo eafia mulamula foga felo keuma'i kapa goldai kekapa auga alogai eukaisa epapogua. Ke eafia epiulaisa eake agofa'a elao. Ega aisama ufa eauniia a'o, ke a'oa'o akaiki'a emia, ke kimage eafi, ke kafokau akaiki'a emai.

Fi'i A'o'i

⁶Egae kai agelo imagea gua fi'i imagea gua keafii'i au'i, kefua fi'i kegaipini'i keoma.

⁷Ke agelo eufai auga ega fi'i eipinia. Ega aisama aisi o'opi'i imu akaiki'a koa ufa keake, ke lo ifa fou ekaifou auga ufa kepiulai'i keake kemai aagoai. Ke agofa'a fofouga alogai, ago oiso koa i'opoga auga epogai aga'omo eaga. Ke au fofouga oiso koa i'opo'i au'i epo'iai aga'omo eaga. Ke ega'ina ago alogai mukimuki fofouga keaga.

⁸Ke agelo gua auga ega fi'i eipinia. Ega aisama kapa aga'o iku akaiki'a koa i'opoga eufa auga, keafia a'uai kepiulaisa. Ke a'u fofouga alogai oiso koa i'opoga auga epo'iai aga'omo auga ifa emia. ⁹Ke a'u alogai kapa ma'oai maa'l'i mauni'i gopu oiso koa i'opo'i epo'iai gopu aga'o auga kemae. Ke lonti fofouga gopu oiso koa i'opo'i au'i, epo'iai gopu aga'o auga keauoka afe'aini'i.

¹⁰Ke agelo oiso auga ega fi'i eipinia. Ega aisama mi'imi'i akaiki'a ikui koa i'opoga eaga auga, ufa e'uulai eake. Ke eake emai agapuge fofouga alogai oiso koa i'opoga auga, epo'iai aga'omo auga alogai e'uulai. Ke

fei ifo e'uki auga isafa laagai e'ualai. ¹¹ Ke mi'im'i ega'ina aka 'Kimu,' keoma. Ke fei fofouga alogai oiso koa i'opoga auga epo'iai aga'omo auga ekimu. Ke papiau fei ega'ina ekimu auga keinu puogai ma'o kemae.

¹² Ke agelo pani auga ega fi'i eipinia. Ega aisama kina, gafa, ke mi'im'i fofouga alogai oiso koa i'opoga auga, aga'omo auga keaunia. Ega puo keauga afuga auga epa'uminania. Ke kina aga'omo fofouga alogai, kina maaga oiso koa i'opoga auga, aga'omo auga alogai eaea laa'i emia. Ke gapi isafa faagagai ega koa i'opoga emia.

¹³ Ke maaau elao aisama, paili ufa gua ipuainagai egopo, aina akaiki'agai iina eifa oma aina lalogonia:

"Agelo oiso e'i fi'i kekae paukai akeipini'i kainai, agofa'ai keague au'i afa apala akeafia! Afa apala akeafia! Afa apala akeafia paisa!" eoma.

9 ¹ Ke agelo ima auga ega fi'i eipinia. Ega aisama lau mi'im'i aga'o ufae e'ualai eake agofa'ai laisa. Ke mi'im'i ega'ina, Abis^m pa'afina fepaagalaisa auga isapuga eafia. ² Ke isa Abis pa'afina epaagalaisa aisama, aku, lo akaiki'a ipaumagai e'agaukae emai auga koa i'opoga. Ke aku Abis alogai e'agaukae emai auga kina, ke ufa gua fou epa'uminani'i. ³ Ke ega'ina akuga alogai, apela'opu keake kemai agofa'ai. Ke isa auga agofa'ai aoao ega isapu koa i'opoga keafia kemai. ⁴ Ke isa kepaini'i agofa'ai mukimuki, o au, o aupu gagau'i aga'o fakepalifu'i keoma. Kai isa kepaini'i papiau kapal'i paku'iai Deo ega maka akeoge au'i mo fekepalifu'i keoma. ⁵ Kai isa ega'ina papiau'i fekeupugu'i auga isapuga akeafia kai, isa gafa ima alogai, isa kiekie akaiki'a fekepeni'i auga mo isapuga keafia. Ke isa kiekie akaiki'a keafia auga, aoao aufalao aga'o eaga faaga ekiekie auga koa i'opoga kiekie keafia. ⁶ Ega'ina kina'i alo'iai, papiau mae akekapuga kai, afakekapulaisa.

Ke alo'i ko'agai fekemae akeoma kai, mae isa age'ege'i.

⁷ Ke apela'opu ega'ina au'i auga, ot ikepafua'i ifani kegalao keoma au'i koa iisa'i. Isa kania'iai auga kin kania'iai kraon keoge, goldai kekapa auga koa i'opoga auga kania'iai keogeisa. Ke kua'i maa'i auga, papiau aumauni kua'i maa'i koa i'opoga. ⁸ Ke fufu'i auga papie fufu'i maefa koa i'opoga. Ke nie'i auga laion nie'i koa i'opoga. ⁹ Ke olaga'i ipakaisapuga kapa auga aulai koa i'opoga kekapaisa olaga'iai keogeisa. Ke pani'i a'o auga, ot i ma'o pulieta kela'a kepiau ifani kelao ife'i a'o ufa koa eauga auga koa i'opoga emia. ¹⁰ Ke isa iu'i auga aoao koa i'opoga iu'i emia, ke e'i piaga isafa ega koa i'opoga emia. Ke gafa ima alogai iu'iai papiau kiekie akaiki'a fekepeni'i auga isapuga keafia. ¹¹ Ke isa fe'ima'i kinina eagu. Ke ega'ina kinina auga Abis agelo. Ke isa aka Hibru malagai keifaga Abaddon,ⁿ ke Grik malagai auga, keifaga Apollion^o keoma.

^m 9:1 Ega'ina auga a'isa papagai ipauma, ipu aga'o eake alogaina, maa'a ageake papa afalaisa auga fouga eifania. ⁿ 9:11 Kapa ma'oai isauoka auga. ^o 9:11 Kapa ma'oai isauoka auga.

¹² Af a apala ipauma eufai auga epagai efua. Ke af a apala gua mo kekae akemai koa.

¹³ Ke agelo imagea auga ega fi'i eipinia. Ega aisama Deo agogai amu Deo kepa'a penia afuga goldai kekapa auga afugai afiau afuga pa'oai kekapa auga afugai aufalao aga'o aina emai lalogonia. ¹⁴ Ke aufalao aga'o ega'ina agelo imagea auga epainia einaka, "Agelo pani agapuge akaiki'a aka Eufrates kegopei'i au'i fogupuki'i fopapealai'i," eoma. ¹⁵ Ke agelo pani ega'ina au'i, agofa'a fofouga papiau'i ma'oai oiso koa i'opo'i auga epo'iai aga'omo koa i'opoga auga fekeauapugu'i keoma puo, kegopei'i kepfafual'i keagu i'ina inipoga, i'ina gafa, i'ina kina, ke i'ina kina maaga ke'imaisa. ¹⁶ Ke agelo au'i pani ega'ina au'i, ifani au'i otiai keaguka au'i 200 million kepapea'i. Ke lau isa au'i pika auga keifania a'o lalogonia.

¹⁷ Ke lalau alogai oti ke oti laagai keaguka au'i iisa'i iina koa laisa'i: Isa olaga'i ipakaisapuga aulina auga, lo ei'a pitoga koa i'opoga, aku umuga ipauma koa emia, ke mulamula isapuga ipauma laofaga koa i'opoga emia. Ke oti kania'i iisa auga, laion kania'i koa i'opoga kemia. Ke oti ake'iai lo, aku, ke mulamula isapuga ipauma laofaga auga fou kepealai. ¹⁸ Ke i'ina kapa'i apala'i oiso lo, aku, ke mulamula isapuga ipauma laofaga oti ake'iai kepealai au'i, agofa'ai papiau fofouga auga gopu oiso koa i'opo'i au'i epo'iai gopu aga'o auga kepameai'i. ¹⁹ Gome oti e'i isapu auga ake'iai, ke iu'iai fou keka. Ke isa iu'i ega'ina auga, kaapa kania'i koa i'opoga. Ke iu'i ega'inagai kania'i kekae papiau kepalifu'i.

²⁰ Kai papiau kapa apala'i oiso i'inagai akemae koa au'i auga, ifo'i ima'iai kapa apala'i kekapai'i au'i akeumakalaini'i. Ke isa tiapolo ke deo pifoge'i goldai, silifai, kopai, kepoai ke auai kekapa'i, kapa aga'o afakeisa ke kapa aga'o a'o afakelogo ke afakepea au'i keau afagaini'i auga akeapakipo. ²¹ Ke isa isafa papiau keaupugu'i, ugauga laoga maina, amage koa lao'i mai'i apala'i kekapa'i au'i, ke painao lao'i mai'i akeumakalaini'i.

Agelo Ke Puka E'ele Auga Fou Fou'i

10 ¹ Egae kai lau agelo ekapula alogaina auga aga'o ufai eake emai laisa. Ke apuapu auga tiapu koa kepai'iuka. Ke ananati isa kania laagai efai elao. Ke kua maaga auga kina koa i'opoga emia. Ke ife auga ipalao loai eaga epito auga koa i'opoga emia. ² Ke imagai puka e'ele eega umamo auga eafitia. Isa ife kaina auga a'uai epaapa, ke lafanina auga aagoai epaapa. ³ Ke isa laion eagaga koa i'opoga, aina akaiki'agai eagaga. Ke eagaga aisama, ufa eauga a'o akaiki'a emia auga au'i imagea gua au'i iifa kepamue. ⁴ Ke ufa eauga auga au'i imagea gua kenini'ani aisama, lau kapa aga'o mapapua laomaoma kai, ufai aufalao aga'o iina eifa oma aina lalogonia, "Puka ipaaifiapina kapa moafia puka mopaafiapia, ke ufa eauga au'i imagea gua au'i kapa'ina keifania auga ogefake kapa gamia, folopapua," eoma.

⁵Ke agelo ife apie a'uai epaapa, ke apie aagoai epaapa auga ima kaina eafiakae ufa Deo eagu afuga epa'a penia laisa. ⁶Deo auga eague aoniamo, ke Isa ufa epagama, ke kapa ma'oai ufa kekae au'i isafa epagama'i. Ke Isa aagoa epagama, ke kapa ma'oai aagoai kekae au'i isafa epagama'i. Ke Isa a'u epagama, ke kapa ma'oai a'uai kekae au'i isafa epagama'i. Agelo lau laisa auga, Deo ega'ina faagagai pako'a iifaga ekapaisa, ke eifa einaka, "Deo kina eifania auga kina afaeafiapia! ⁷Kai Isa agelo imagea gua auga ega fi'i ageipina kina'i ai aisama, Deo ega ogefake kapa'i fekemia eoma auga agepafua'i. Ega'ina auga Isa ega pinauga au'i profeta maa'iai eifania koa i'opoga mo agemia," eoma.

⁸Egae kai ufa aufalao aga'o aina lalogo auga, lau maaui eifa pugu einaka, "Molao agelo ife apie a'uai epaapa, ke apie aagoai epaapa auga imagai puka e'ele eega umamo ekae auga moafia," eoma.

⁹Ke lau lalao agelo eegai ke lapainia puka e'ele ega'ina gapeniau laoma. Ke isa lau epainiau einaka, "Moafia moania! Ke aloania aisama, akemuai auga meme'uge feina emeki'a alogaina auga koa i'opoga agemia. Kai ageake agelao guamu alogai aisama agekimu," eoma. ¹⁰Ke lau isa imagai puka e'ele ega'ina laafilia laanii. Ega aisama akeuai auga meme'uge feina emeki'a alogaina auga koa i'opoga emia. Kai lakogopia eake elao aisama, guau alogai ekimu. ¹¹Ke isa lau epainiau einaka, "Oi ago ma'o, papiau ma'o, mala ma'o papiau'i, ke kin ma'o isafa maa'iai ega'ina kapa'i fou'i profeta koa fomia foifafou'i pugu," eoma.

Papiau Auni'i Deo Ega Iifa Ega'ina Ko'a Keoma Au'i

11 ¹Ke isa lau inipo auga, i'opo koa i'opoga auga epeniau, ke epainiau einaka, "Molao Deo ega e'a ke a'o Deo kepa'a penia afuga mo'opo, ke egae papiau Deo keau afagaina au'i mopauni'i. ²Kai Deo ega e'a afe kaina auga fopua'afuga folo'opo. Gome Deo ega'ina afuga auga Judea papiau'i laa'i au'i epenii'i. Isa gafa ma'oai 42 alogai Deo ega Taoni laagai akepea akegafamu'a. ³Ke lau e'u pinauga au'i auni'i, iifa ko'a mo keifafoua au'i isapu alapeni'i. Ke isa ofuofu tiapu'i koa ake'i'uuka'i, profeta koa i'opo'i akemia, kina ma'oai 1,260 alogai, Deo ega iifa akeifafoua," eoma. ⁴I'ina au'i auga, au aka olive au'i auni'i, ke lanepa ipa'afa'i afu'i auni'i, agofa'a i'ima Lopiaga agogai keapa au'i. ⁵Ke aufalao aga'o age'opo isa gapalifu'i ageoma koa aisama, isa ake'i'ai lo agepealai e'i ou au'i ageuma'i, ke isa ou au'i ega'ina akekogopi'i. Aufalao aga'o isa gapalifu'i eoma auga ega agemae oma. ⁶Ega'ina au'i auni'i auga ufa gua fekekupuga auga isapuga keafilia, ega koa isa profeta koa kemia kenini'ani alogai imu aga'o afaeau. Ke isa fei ifa fekepamia auga isapuga keafilia. Ke isa anina akeani kina kapagai kapa apala'i i'oi'i i'oi'i fekeulai'i aagoa fekemai akeoma auga isafa isapuga keafilia.

⁷Ke isa Deo ega iifa ko'a auga akeifafoua afegai aisama, Abis^p alogai ifeni koa i'opoga e'agaukae emai auga isa fou akepipaini, ke ifeni koa i'opoga ega'ina auga isa auni'i agepalutini'i ageaupugu'i. ⁸Ke isa auni'i imaa'u'i taoni akaiki'a alogai keafa'ai akeka. Ega'ina taonina auga Deo ega Spiritu ega isapuui aganini'ani aisama, isa Sodom taonina, ke Isipto ago, ke egae isa e'i Lopia isafa kolotiai keau'u'ua agaoma. ⁹Ke kina fofou'i oiso, ke kina aga'o agelao atiafa ageafia alogai, papiau ma'oai, ikupu ma'oai, mala ma'oai, ke ago ma'oai alo'iai kemai au'i isa imaa'u'i akeisa'i. Ke afakelogoaini'i papiau kemae keoge'i laagai afakefufuni'i. ¹⁰Ke agofa'ai keague au'i isa akealogama laini'i, ke alo'i agegama alogaina. Ke isa aga'o aga'o ee'iai pipeni amu'i akeulai'i. Gome profeta i'ina au'i isa agofa'ai keague au'i faaga'i kepakiekie alogaina.

¹¹Kai kina oiso fofou'i, ke kina aga'o elao atiafa eafia afegeai aisama, Deo eegai spiritu emai mauni epipeni auga spirituga emai isa imaa'u'i alogai ekoko. Ke isa ke'ue keapa. Ega aisama isa keisa'i papiau'i mani'i akaiki'a alo'iai e'uegekae. ¹²Egae kai ufa aufalao aga'o aina akaiki'a isa epaini'i, "Amo'agaukae iina omai," eoma aina kelogonia. Ega aisama isa e'i ou au'l'i maa'l'i elao keisaisa'i kai, isa apuapuui ke'agaukae kelao ufa.

¹³Ke ega'ina kina maagai mo, kafokau akaiki'a ipauma emai, ke taoni fofouga alogai kapa ma'oai ou'aga koa i'opo'i auga, aga'omo koa i'opoga auga e'ualai. Ke papiau ma'oai 7,000 kafokau ega'ina alogai kemae. Ke papiau akemae au'i kemani'i alogaina, ke Deo ufa i'ima auga au akaiki'a kepamia.

¹⁴Ega'ina auga afa apala gua emai auga. Ke amoisa afa apala oiso auga emai efua, afa'agamo agemai.

Fii'i Imagea Gua Auga

¹⁵Egae kai agelo imagea gua auga ega fi'i eipinia. Ega aisama ufaipapiau ma'o koa aina'i akaiki'a eake emai eifa einaka:

"Kapa'inai i'ina agofa'a apuga auga,
i'a a'a Lopia ke ega Kristo fou apu'i emia.

Ke Lopia ega'ina afuga agel'ima aoniamoa," eoma.

¹⁶Ega aisama au akaiki'a'i ufai keague au'i 24, Deo agogai e'i aguagu afugai keagu au'i, Deo agogai keomukipo, keau afagaina. ¹⁷Ke keifa keinaka:

"Lopia Deo,
kapa ma'oai alokapal'i agekaina Aumu,
ufainagai loagu ke pau loague aumu,
tenkiu akaiki'a apenio.

Gome oi emu isapu akaiki'a ipauma loafia,

^p 11:7 9:1 foisa.

ke lo'ina kapa ma'oai lo'ima'i.

¹⁸ Ke agofa'a papiau'i oi eemuai gua'i ekupu,
ke oi emu guakupu isa ee'i emai.

Ke pau papiau kemaе au'i e'i laomai felo,
o apala afa fopeni'i auga kina emai ekainia.

Ke profeta oi emu pinauga au'i, oi emu papiau, ke papiau akaiki'a'i, o
e'ele'i fou

kai'ialao oi akamu kemani'iaina au'i e'i laomai felo afa alopeni'i auga
isafa kina ekainia.

Kai kaisau agofa'a keauoka au'i afa apala alopeni'i, aloauoka'i auga isafa
kina emai ekainia," keoma.

¹⁹ Ega'ina afegai Deo ega e'a ufafai ekae auga kepaagalaisa. Ke Isa ega
e'a ega'ina alogai, Deo pako'a iifaga ega papiau maa'iai ekapa auga gouga
sikunaga egae eka laisa. Ke ufa eaunia a'o, ke a'oa'o akaiki'a emia, ke
kimage eafi, ke kafokau akaiki'a emai, ke aisi o'opi'i imu akaiki'a koa
i'opoga auga eake.

Papie Ke Kaapa Akaiki'a Ipauma Mai'ife Maipanina Auga

12 ¹Ega'ina afegai ufafai gou akaiki'a ipauma epealai. Gou ega'ina
alogai papie aga'o, kina auga isa ega tiapu epamia ei'iuka ke ife
papagai gafa eka ke kaniagai mi'imi'i 12, kin kania'iai kraon keoge auga
koa i'opoga kemia kaniagai eoge'i'i laisa. ²Isa einae ke ega mauni kina
ekainia aisama, ega kiekiae eagaga. ³Ke ufafai gou i'oina aga'o epealai
pugu. Gou ega'ina alogai, kaapa akaiki'a ipauma mai'ife maipanina faaga
pitoga auga laisa. Isa kania imagea gua, ke pa'o ou'aga, ke kania imagea
gua laagai kin kaniagai kraon keoge auga eoge'i'i. ⁴Isa iugai ufafai mi'imi'i
fotouga epo'iai oiso koa i'opoga auga, aga'omo koa i'opoga auga ela'alai'i,
ke epiulai'i keake aagoai. Ke kaapa papie ega'ina gamauni eoma auga
agogai eapa, ega koa isa afemauni koa aisama, fiakoa mo gauga fekogopa
eoma. ⁵Ke papie ega'ina imoi maguaega epamauga. Ke ega'ina imoina
isapu eafia auga gouga aulina ageafia agofa'a fotouga papiau'i ma'oai
age'ima'i. Deo papie ega'ina gauga eafia elaoaina Isa ega aguagu afugai.
⁶Kai papie auga epiau ago maini elao. Ega'ina afuga auga Deo isa faugai
epafua eka, ega koa kina ma'oai mo 1,260 alogai isa feke'ima eoma.

⁷Egae kai ufafai ifani emia. Lopia agelo aka Michael, ega agelo fou, kaapa
mai'ife ke maipanina auga fou kecipaini. Ke kaapa ega'ina isafa, ega agelo
apala'i fou Michael ega agelo fou kecipaini. ⁸Kai kaapa ega'ina ega kapula,
Michael ega kapula aeka'egaina, ke isa ega agelo apala'i fou ufafai afu'i eka
auga kepagea. ⁹Kaapa akaiki'a ipauma ega'ina auga keafia kepiulaisa
eake. Isa auga kaapa ufaina, kepafaala tiapolo, o tiapolo e'i lopia aka
Satani keoma. Ke isa agofa'a fotouga papiau'i efoge'i. Ke isa kepiulaisa
eake agofa'ai aisama, isa ega agelo apala'i au'i fou kai'ialao kepiulai'i.

¹⁰Ega aisama lau ufaifalao aga'o aina akaiki'a emai iina eifa oma aina lalogonia pugu:

Pau papiau kania'i isagamauga, isapuga, ke i'a a'a Deo ega agofa'a, ke isa ega Mesaia papiau fe'ima'i isapuga eafia auga fou kemai efua.

Gome i'a aa'a aki'a pako'a papiau'i epaagu fofou'i auga, ke aufa kina kinai ke gapiat Deo agogai isa epaagu fofou'i aefuafua auga, kepiulaisa eake.

¹¹Kai pako'a au'i,

Sipi Gauga ifagai, ke Deo ega iifa ko'a mo keifafoua auga faagagai isa kepolutinia.

Ega'ina papiau'i au'i,

alo'i ko'agai ifo'i e'i agu maunina anina akeani, ega mo keagu oma elao kemae.

¹²Ega puo oi ufaifalao aumi, ke oi isa fou oague aumi alomi gagama.

Kai oi pako'a aumi laa'i,

aagoai ke a'uai oague aumi,

Deo oi afa apala ipauma fepenimi laoma. Gome tiapolo eake oi eemi efai.

Isa auga gua ekupu alogaina,

gome isa elogo ega kina maaga ofola'o," eoma.

¹³Ke kaapa mai'life, maipanina ega'ina kepiulaisa eake agofa'ai elogo aisama, isa papie imoi maguaega ega'ina epamauga auga papiega muninai elao eafi apalania. ¹⁴Ega aisama paili akaiki'a ipauma panina auni'i papie kepeniia, ega koa isa fegopo felao ago maininai isa faugai afuga kepfua ekae auga afugai feagu. Ke isa felao ega'ina afuga, kaapa ageafia afaekaina auga afugai, inipo oiso, ke gafa imagea^q alogai egae feke'ima eoma. ¹⁵Ega aisama kaapa ega'ina akegai fei akaiki'a agapuge koa i'opoga eakilaisa papie muninai elao, ega koa fei ega'ina felao papie feka'egaina pugepugegai fepakipo eoma. ¹⁶Kai aagoa ake epaagalaisa, kaapa ega'ina akegai agapuge eakilaisa auga ekogopia faagagai papie epalagaina. ¹⁷⁻¹⁸Ega aisama kaapa ega'ina papie eegai gua ekupu alogaina. Ke ekailai elao papie ega'ina gauga kapa'i mo keague au'i fou fekeifani eoma. Ega'ina papiau'i auga, Deo ega iifa kapula'i kainai kepea, ke Iesu Kristo iifa ko'a eifaifoua keafiapia mo au'i. Ke isa papiau ega'ina au'i fou fekeifani eoma puo, elao foear eapa.

Ifeni Koa I'opoga A'uai Emai Auga

13

¹Ega aisama lau a'uai ifeni koa i'opoga aga'o e'agaukae emai laisa. Ke ifeni koa i'opoga ega'ina pa'o ou'aga, ke kania imagea

^q 12:14 Grik malagai kepapua pagainia emai Pilitani malagai auga, 'time, times and half a time.'

gua, ke kin kania'iai kraon keogeoge au'i, ou'aga isa pa'ogai eogeau'i. Ke aka Deo keifa apala penia auga aka'i isa kania aga'o aga'ogai keka. ²Ke ifeni koa i'opoga ega'ina lau laisa auga, iiisa miini akaiki'a aka leopard koa i'opoga. Kai ife auga a'o akaiki'a aka bear ife koa i'opoga. Ke ake auga laion ake koa i'opoga. Ke kaapa mai'ife maipanina auga, ega kapula, ega aguagu afuga, ke kapa isa'i fe'ima'i isapu akaiki'a a'o ega'ina apala epeniia. ³Ke a'o ega'ina kania aga'ogai auga, kua akaiki'a isa fepamaea auga kua eka kai, kua akaiki'a ega'ina fepamaea koa i'opoga auga egama. Ega aisama agofa'a fofouga papiau'i keopofua, ifeni koa i'opoga ega'ina muninai kepea. ⁴Ke papiau kaapa ega'ina keau afagaina, gome isa isapu ifeni koa i'opoga ega'ina epeniia. Ke isa ifeni koa i'opoga ega'ina isafa keau afagaina ke keifa keinaka, "Kaisau auga, ifeni koa i'opoga i'ina auga fou i'opo'i mo? Ke kaisau isa fou akeifani agekaina? Kai aga'o laa'i," keoma.

⁵Ke a'o ega'ina ake auga aina'au iifa'i, ke Deo eegai feifa apala auga ake kaapa eegai eafia. Ega koa gafa 42 alogai isa ega'ina isapuga fepapinauga eoma. ⁶Isa ake epaagalaisa Deo eegai gaifa apala, ke Deo aka, ke ega aguagu afuga, ke kaisau ufaif eague au'i aka'i gapalifua eoma. ⁷Ke isa isapu kepeniia, Deo ega papiau fou fekeifani, ke fepalutini'i eoma. Ke isa isapu kepeniia, ikupu ma'oai, papiau ma'oai, mala ma'oai, ke ago ma'oai papiau'i fe'ima'i eoma. ⁸Ke agofa'ai keague au'i ma'oai a'o ega'ina akeau afagaina. Ega'ina papiau'i ma'oai aka'i auga, ufainagai Deo agofa'a aepagama koa kai, papiau agu pagai maunina fekeafia eoma pukagai aka'i aepapua'i au'i. Ke puka ega'ina auga papiau Sipi Gauga keaupugua auga apuga.

⁹Kaisau aina ekae auga, lau kapa'ina laifania auga ainau felogo!

¹⁰Ke aufalao aga'o fekeafia fekegope keoma auga, akeafia akegope. Ke aufalao aga'o ifani a'ifagai fekeauupugua keoma auga, ifani a'ifagai akeauupugua.

Ega'ina puogai Deo ega papiau au'i auga, e'i pako'a Deo eegai fekeoge, ke kapa'ina faaga'iai fekemia mo ganinagai, gamuga mo fekeopo fekeafiapia mo.

Ifeni Koa I'opoga Aagoai Emai Auga

¹¹Ega'ina afegai ifeni koa i'opoga i'oina aga'o aagoai e'agaukae emai auga laisa. Isa sipi gauga koa i'opoga pa'o auni'i e'ele'i kai, kaapa mai'ife maipanina enini'ani koa i'opoga enini'ani. ¹²Isa ifeni koa i'opoga emai kaukau auga, agogai ega isapu ma'oai epapinauga. Ke agofa'ai keague au'i ma'oai elaoaini'i ifeni koa i'opoga emai kaukau, kaniagai kua isa fepamaea koa kua egama afuga laisa auga ifenina keau afagaina. ¹³Ke isa gou akaiki'a'i ekapai'i. Ega koa isa lo ufaif epaake emai aagoai papiau ago'iai keisa. ¹⁴Isa a'o emai kakaua auga faugai fepinauga isapuga

eafia kainai, ega'ina isapugai gou ekapai'i agofa'ai keagu au'i efoge'i. Isa ega'ina papiau'i epaini'i, a'o ifani a'ifagai keagaisa kai, eague auga faugai, isa iisa i'opoga mo kapa aga'ogai fekekapa fekepaapa eoma. ¹⁵ Ke isa isapu kepenia, ifeni koa i'opoga emai kakaua, iisa i'opoga mo papiau kekapa auga alogai feipiuka mauni fepenia eoma. Ega koa ifeni koa i'opoga emai kaukau iisa i'opoga mo ega'ina auga, fenini'ani ke ifeni koa i'opoga iisa i'opoga isau afagaina keumaka au'i ma'oai fepamae'i eoma. ¹⁶ Ke isa papiau ma'oai, e'ele'i, o akaiki'a'i, ke ulalu au'i, o pa'amu'amu au'i, ke kala'afi au'i, o papiau aage'i ma'oai epaafi'i aga'o aga'o ima'i kaina kainai, o paku'iae maka fekeoge eoma. ¹⁷Ega koa kaisau maka ega'ina afaeafia koa aisama, kapa aga'o age'afa'afalaina, ke age'afa afaekaina. Ke maka ega'ina auga ifeni koa i'opoga ega'ina aka, o isa aka nambaga.

¹⁸Ega'ina puogai i'a ikifa anina faani. Aufalao aga'o opola felo eafia auga, ifeni koa i'opoga ega'ina ega namba fepaauga fekapulaisa. Gome namba ega'ina auga papiau aumauni ega namba. Ke isa ega namba auga 666.

Sipi Gauga Ke Papiau Au'i 144,000 Au'i Fou

14 ¹Moisa! Egae kai maau elao aisama, Sipi Gauga Sion ikugai eapa laisa. Ke papiau ma'oai 144,000 paku'iae isa aka, ke isa Ama aka fou kepapua'i au'i isafa fou egae keapa laisa'i. ²Ke lau ufa a'oa'o, fei epiau fa'i'i fopai eauga a'o koa i'opoga, ke ufa eauga a'o akaiki'a emia auga koa i'opoga a'o lalogonia. Kai a'oa'o ega'ina a'o lalogonia auga, papiau ma'o e'i harp' kepa'opuani'i auga koa i'opoga a'o emia. ³Ke Deo ega aguagu afuga, ke pagama kapai'i maa'i maunina pani, ke au akaiki'a'u ufa keague au'i ago'iae iifi mamaga keifinia. Kai ega'ina iifina auga kai aga'o aage aemaleleaina kai, Iesu ifagai agofa'ai papiau au'i 144,000 e'afa'i au'i mo, ega'ina iifina kemaleleaina. ⁴Isa auga papie fou amage koa laoga maina akekapaisa, alo'i aeofu. Ke isa Sipi Gauga ala elao auga muninai kepea. Isa auga Deo isa papiau epo'iae e'afai'i, ke uma alogai fo'ama an'i keoge kakau'i au'i keaf'i Deo kepa'a penia koa i'opoga, isa fo'ama an'i keoge kakau'i koa kepamia'i keafii'i Deo ke Sipi Gauga fou kepalao peni'i. ⁵Ke isa ake'iae pifoge aga'o akekapulaisa. Ke kai aga'o isa e'i apala aga'o aeisa.

Agelo Oiso

⁶Egae kai lau agelo i'oina aga'o ufa guagai egopo laisa. Isa papiau agofa'ai keague au'i, ago i'oi'i i'oi'i au'i, ikupu i'oi'i i'oi'i au'i, ke mala i'oi'i i'oi'i papiau'i ma'oai maa'iae iifa faunina Iesu fougha ageka aoniamo

^r 14:2 5:8 foisa.

auga feifafoua eoma. ⁷Ke agelo ega'ina aina akaiki'agai eifa einaka, “Deo fomani'iaina, ke Isa au akaiki'a fopamia. Gome Isa papiau e'i laomai felo, o apala afa agepeni'i auga kina maaga emai efua. Ke Isa ufa, aagoa, a'u, ke fei gome kapai emai auga epagama'i auga amoau afagaina,” eoma.

⁸Ke agelo gua auga isa muninai mo eifa einaka, “Babilon, ago akaiki'a, ago ma'oai papiau'i fino kapula ipauma epenii'i keinu, amage koa lao'i mai'i apala'i ipauma'i kekapai'i auga, e'ualai efua, e'ualai efua,” eoma.

⁹Ke agelo oiso auga, aina akaiki'agai isa muni'iae eifa einaka, “Aufalao aga'o ifeni koa i'opoga auga, ke papiau isa iisa i'opoga mo kekapa auga, ageau afagaina, ke ega maka pakugai, o imagai akeoge koa aisama, ¹⁰Deo ega guakupu auga fino koa i'opoga isa isafa ageinu. Deo ega guakupu ega'ina, fino koa i'opoga auga, kapulaga ipauma eafia ega guakupu kaputinai epa'efauka auga. Ke au ega'ina fino ega'ina ageinu aisama, Deo ega agelo, ke Sipi Gauga fou ago'iae isa loai ke mulamula laofaga isapuga ipaumagai ageaga agekiekie alogaina. ¹¹Ke isa ageaga agekiekie auga akuga age'agau afaefuafua. Ke kaisau ifeni koa i'opoga auga, ke papiau isa iisa i'opoga mo kekapa auga, ageau afagaina, ke ega maka ageafia auga, gapi gani afaelaagai laa'i ipauma,” eoma. ¹²Ega'ina puogai Deo ega papiau au'i Deo ega iifa kapula'i kai'iae kepea au'i, ke e'i pako'a Iesu eegai keoge paisa au'i, kapa'ina mo faaga'iae fekemia mo ganinagai, gamuga mo fekeopo fekeafiapia mo.

¹³Egae kai lau ufai aufalao aga'o iina eifa oma aina lalogonia, “Pau papiau Lopia puogai kemae au'i Deo eegai kapa felo'i akeafili auga fougua mopapua,” eoma.

Ega aisama Deo ega Spiritu eifa einaka, “E, ko'a ipauma! Isa e'i afipuguai akelaagai, gome isa e'i pinauga felo afa akeafia,” eoma.

Kina Fuagai Papiau Akepakai Guguaini'i

¹⁴Moisa! Ke maau elao pugu aisama, agouai apuapu keloga laisa. Ke apuapu ega'inagai aufalao aga'o, ‘papiau aumauni gauga’ koa i'opoga kaniagai kin kania'iae kraon keoge auga koa i'opoga goldai kekapa auga eogeisa. Ke fo'ama isafina a'ifaga eako alogaina auga imagai eafia eagu. ¹⁵Ke agelo i'oina aga'o Deo ega e'a alogai epealai emai aina akaiki'agai, isa apuapuai eagu auga epainia einaka, “Oi emu fo'ama isafina a'ifaga moafia fo'ama moafia. Gome agofa'ai fo'ama ani'i keoge'i'i efua, ke fo'ama i'afe kina maaga emai efua,” eoma. ¹⁶Ega puo apuapuai eagu auga, ega fo'ama isafina a'ifaga aagoa laagai e'afiosa, ke aagoa fo'ama'i ma'oai eafii'i.

¹⁷Ke ufai agelo i'oina aga'o Deo ega e'a alogai epealai emai, ke isa isafa imagai fo'ama i'afe a'ifaga maaga eako alogaina auga eafia emai. ¹⁸Ke agelo i'oina aga'o lo e'ima auga Deo a'l'kepa'a penia afugai epealai emai. Isa aina akaiki'agai agelo fo'ama i'afe a'ifaga maaga eako alogaina imagai eafia auga

epainia einaka, "Oi emu a'ifa maaga aakoga auga moafia aagoai fino anina mofou'i mopakai guguaini'i, gome an'i keaifa efua," eoma. ¹⁹ Ke agelo ega'ina ega a'ifa aagoa laagai e'afiosa, ke fino anina ma'laoi epakai guguaini'i emaiseini'i, Deo ega guakupu afuga, fino ikapa afuga akaik'i alogai epiu koko'i. ²⁰ Ke Deo ega taoni afegai, fino ikapa afuga akaik'i a ega'ina auga afugai fino an'i ega'ina kegafamu'a'i. Ke ega'ina afugai ifa epealai, ega moai auga ot i akegai auli keoge auga faagagai eake a'isaa'i koa i'opoga. Ke ega maefa auga 320 kilomita.

Agelo Au'i Imagea Gua Kapa Apala'i Keafii'i Kemai Au'i

15

15 ¹Egae kai lau ufaia akaiki'a i'oina aga'o papiau fekeisa fekeopofua
auga gouga laisa. Ega'ina auga agelo au'i imagea gua kapa apala'i
imagea gua muniai ipauma keafii'l kemai au'i. Lau kapa apala'i egal'ina au'i
muniai ipauma au'i laoma, gome isa faagai'iai Deo ega guakupu agepafua. ²Ke
lau kalati a'u koa i'opoga, lo fou keogegefoua auga laisa. Ke papiau kapali ifeni
koa i'opoga, ke papiau isa iisa i'opoga mo kekapa auga, ke isa aka nambaga fou
kepalutin'i au'i a'u ega'ina niegai keapa laisa'i. Ke Deo isa harp epenii'l auga
ima'iai keafii'l. ³Ke isa Deo ega pinauga auga Moses ega iifi, ke Sipi Gauga fou
e'i iifi keifinia keinaka;

“Lopia Deo kapa ma'oai alokapa'i agekaina Aumu,
oi kapa'ina lokapa'i au'i, akaiki'a'i ipauma'i, ke papiau keisa'i keopofua.
 Oi agofa'a fofouga e'i Kin Aumu,
 Oi emu keaga auga opaina ke ko'a ipauma.

⁴O Lopia, kaisau Oi afamani'iainio, ke akamu akaiki'a afapamia?
Gome oi ifomu mo alo lolofa Aumu.

gome Oi emu pinauga opaina auga papiau maa'iai lopafokia," keoma.

5 Ega'ina afegai lau maau elao aisama, ufaf Deo ega e'a, Deo iifa ko'a eifania auga gouga e'a e'ele epaagalaisa auga laisa. 6 Ke Deo ega e'a alogai agelo imagea gua, kapa apala'i imagea gua keafili au'i kepealai kemai. Ke isa tiapu felo ipauma linen keoma au'i, aifofu'i ke kekimage au'i kei'iukai'i, ke olaga'lai tiapu goldai kekapa'i au'i kegope pagaini'i. 7 Ke pagama kapa'i maa'l maunina au'i pani epo'iai aga'o auga agelo au'i imagea gua au'i liti goldai kekapa'i au'i ma'oai imagea gua epenii'i keafili'i. Ke ega'ina liti'i alo'i ai auga Deo eague aoniamo Auga ega guakupu kepapogu'i keka. 8 Ke Deo ega isapu, ke eaea akaiki'a ipauma faagagai aku akaiki'a emai Deo ega e'a ega'ina epapogua. Ke kai aga'o Deo ega e'a ega'ina alogai afakeukoko agelao agelo imagea gua e'i kapa apala'i imagea gua au'i akepafua'i afegai kai.

Liti Imagea Gua Alogai Deo Ega Guakupu Keuka'i Au'i

16

¹Egae kai Deo ega e'a alogai aufalao aga'o aina akaiki'a emai agelo au'i imagea gua epaini'i iina eifa oma aina lalogonia.

“Amolao liti imagea gua alo'iai Deo ega guakupu keka au'i, aagoa laagai amofofolai'i,” eoma.

² Ke agelo eufai auga elao ega liti aagoa laagai efopulaisa. Ega aisama papiau ifeni koa i'opoga ega maka keafia au'i, ke papiau ifeni koa i'opoga ega'ina iisa kekapa auga keau afagaina au'i faaga'iai kua iisa'i apala'i ipauma'i keaguau.

³ Ke agelo gua auga ega liti a'u laagai efopulaisa. Ega aisama a'u iisa i'oina emia, au aga'o emae auga ifa koa i'opoga emia. Ke kapa ma'oi a'uai keapa au'i kemae.

⁴ Ke agelo oiso auga ega liti agapuge, ke fei gome'i kapai kemai au'i laa'iai efopulai'i. Ega aisama ega'ina fei'i ifa kemia. ⁵ Ke agelo fei e'ima'i auga iina eifa oma aina lalogonia:

“Oi alo lolofa Aumu, ufainagai loagu, ke pau loague Aumu,

 Oi papiau e'i laomai apala afa ega lopipeni oma puo,

 Oi kapa'ina lokapaisa auga opaina ipauma.

⁶ Gome isa Oi emu papiau, ke profeta fou ifa'i kepafaka.

Ke Oi isa kapa'ina fekeafia auga mo lopeni'i, ifa lopeni'i keinu,” eoma.

⁷ Ke aufalao aga'o aina Deo a'o kepa'a penia afugai epealai emai iina eifa oma aina lalogonia:

“E, Lopia Deo kapa ma'oi alokapa'i agekaina Aumu,

 Oi afa lopipeni auga,

 opaina ke ko'agai mo lopipeni,” eoma.

⁸ Ke agelo pani auga ega liti kina laagai efopulaisa. Ega aisama kina isapu eaifiia, ega'ina isapugai loai papiau eumai'i. ⁹ Ke kina isapuga ipauma isa eumai'i. Kai isa e'i laomai apala'i fekeumakalaini'i auga anina akeani, ke Deo i'ina kapa'i apala'i e'ima'i Auga mo ganinagai au akaiki'a akepamia.

¹⁰ Ke agelo ima auga, ega liti ifeni koa i'opoga ega aguagu afuga laagai efopulaisa. Ega aisama ifeni koa i'opoga auga ega ago e'umina afe'ai. Ke kiekie akaiki'a kainai, papiau mala'i keagaisa. ¹¹ Ke isa kekiekie, ke faaga'iai kua keaguau puogai, ufaif Deo eague auga keifa apala penia. Kai isa kapa'ina kekapa'i au'i akeumakalaini'i.

¹² Ke agelo imagea aga'omo auga ega liti agapuge akaiki'a aka Eufrates keoma auga laagai efopulaisa. Ega aisama ega'ina agapuge efuga, ega koa kin kina e'agaukae afugai kemai au'i e'i keaga fekekapa eoma. ¹³ Ke lau spiritu apala'i^s oiso kulua koa iisa'i au'i laisa'i. Aga'o auga kaapa mai'ife, maipanina auga akegai epealai, ke aga'o auga ifeni koa i'opoga auga akegai epealai, ke aga'o profeta pifoge auga akegai epealai. ¹⁴ Isa auga tiapolo e'i spiritu, isapu akaiki'a'l gou'i kekapa'i au'i. Ke isa kepealai kelao agofa' fofouga kini'i fekepakai guguaini'i, Deo kapa ma'oi agekapa'i agekaina auga ega kina akaiki'agai fou fekepipaini keoma.

^s 16:13 Grik malagai auga spiritu ofu'i ‘unclean spirit’

¹⁵ Ega aisama Sipi Gauga eifa einaka, “Amoisa, lau painao au'i koa i'opoga lafai! Kaisau maaga ekiakae eague, ke afe tiapuga eegai kekae auga faaga maini afaemia, ke papiau ago'iai afaemeagai auga Deo eegai kapa felo'i ageafili,” eoma.

¹⁶ Ke spiritu apala'i oiso au'i, kin ma'oai afu aka Hibru malagai, Armageddon keoma auga afugai kepakai guguaini'i.

¹⁷ Ke agelo imagea gua auga ega liti, ufa guagai efopulaisa. Ega aisama Deo ega e'ai, ega aguagu afugai aufalao aga'o aina akaiki'a iina eifa oma aina lalogonia, “Kapa ma'oai kemia efua!” eoma. ¹⁸ Ega aisama kimage eafi, a'oa'o akaiki'a emia, ufa eaunia, ke kafokau akaiki'a emai. Kafokau ega'ina auga akaiki'a ipauma, papiau aagoai keagu alogai kafokau ega koa i'opoga aga'o aemiamia mo emai ega'ina kinagai kai. ¹⁹ Ke taoni akaiki'a ipauma auga keaupea oiso emia. Ke agofa'a taoni'i ma'oai ke'uulai. Kai Deo Babilon ago akaiki'a auga eopolaga, ke isa ega guakupu fino kaputiae epapogua epenia. ²⁰ Ke keleipua ma'oai kepiaukoko, ke iku aga'o alaisa. ²¹ Ke ufa guagai kepo aga'o aga'o e'i meau 45 kilo koa i'opoga au'i imu akaiki'a koa i'opoga ke'eulai keake papiau laa'iai. Ke kapa apala ega'ina aisi o'opi'i imu akaiki'a koa i'opoga eake ke apala ipauma kainai, papiau Deo keifa apala penia.

Papie Ifeni Koa I'opoga Laagai Eaguka Auga Fouga

17 ¹Egae kai agelo imagea gua liti keafia au'i epo'iai aga'o emai epainiau einaka, “Mai ke lau peage lapau papiega apala ipauma, agofa'a fei'i ma'oai laa'iai eague auga, Deo eegai ega laomai apala ipauma afa ageafia auga alapakiniso. ²Agofa'a kini'i isa fou amage koa lao'i mai'i apala'i kekapai'i, ke agofa'ai keague papiau'i isa fou amage koa lao'i mai'i apala'i fekekapa'i auga fino keinu,” eoma.

³ Ke agelo ega'ina Deo ega Spirituui lau eafiau elaoainiau ago maininai. Egae lau papie aga'o ifeni koa i'opoga faaga pitoga auga laagai eaguka laisa. Ke ifeni koa i'opoga ega'ina faaga fofouga auga aka Deo keifa apala penia auga aka'i faagagai epogu. Ke isa kania ma'oai mo imagea gua, ke pa'o ma'oai ou'aga. ⁴Ke papie ega'ina auga, tiapu felo ipauma umuga eaea,^t ke pitoga koa i'opoga^u auga eil'iuka, ke gold, ke kepo afa'i akaiki'al'i au'i, ke pearl keoma auga kepo'iai ekaikai. Ke isa imagai kaputi goldai kekapa auga eafia. Ke kaputi ega'ina alogai auga Deo gua kepakupua kapa'i, ke papie ega'ina amage koa lao'i mai'i ofu'i ekapai'i au'i, ke laomai apala'i ipauma'i ekapai'i au'i fou ake epogu. ⁵Ke isa pakugai aka iina kepapua oma:

OGEFAKE BABILON, AGO AKAIKI'A AUGA
PEAGE LAPAU PAPIE'I

^t 17:4 Pilitani malagai ‘scarlet’. ^u 17:4 Luka 16:19 foisa.

KE AGOFA'A EE'IAI GUA EKUPU AU'I INAI'

⁶ Ke lau papie ega'ina, Deo ega papiau ifa'iai, ke Iesu fouga ko'a mo keifafoua au'i fou ifa'iai einuinu laisa.

Ke lau isa laisa aisama laopofua. ⁷Ega aisama agelo lau epainiau einaka, "Kapa puo oi loopofua? Lau papie ega'ina, ke ifeni koa i'opoga, kania imagea gua, ke pa'o ou'aga auga laagai eaguka auga ogefake kapal'ina eifania auga fouga maamuai alaifania. ⁸Ifeni koa i'opoga loisa auga ufainagai eagu kai, pau auga aeagu kai, muniai Abis alogai age'agaukae agemai, agelao isa fekeauoka afe'aina auga afugai agekoko. Ke agofa'a papiau'i ifeni koa i'opoga ega'ina akeisa aisama, akeopofua. Gome isa ufainagai eagu, ke pau auga aeagu kai, muni agemai pugu. Papiau akeopofua au'i auga, aka'i Deo agofa'a epagama mo alogai, agu pagai maunina fekeafia eoma pukagai aka'i akepapua au'i.

⁹Ke agelo eifa einaka, "Tina auga ikifai foopolia felo alogaina. Ifeni koa i'opoga kania imagea gua au'i auga, papie iku e'ele'i laa'lai eagu au'i. Ke kania imagea gua au'i auga, kin au'i imagea gua au'i isafa eifani'i. ¹⁰Ega'ina epo'iai kin ima au'i auga, ke'uulai efua. Aga'o auga pau eague, ke i'oina aga'o auga aemai koa. Kai isa agemai aisama, ageagu epo afaemaefa. ¹¹Ke ifeni koa i'opoga ufainagai eagu kai, pau aeagu auga, kin imagea oiso auga. Isa isafa kin imagea gua au'i epo'iai aga'o. Ke agelao isa fekeauoka afe'aina auga afugai agekoko.

¹²"Ke ifeni koa i'opoga pa'o ou'aga loisa'i au'i auga, kin au'i ou'aga e'i ago aga'o akeafia koa au'i. Kai isa kina maaga aga'omo alogai, ifeni koa i'opoga auga fou kin koa i'opo'i papiau feke'ima'i isapuga akeafia. ¹³Ke isa opola aga'omo fekekapa keoma, ke isa e'i kapula ke papiau feke'ima'i auga isapuga ifeni koa i'opoga auga akepenia. ¹⁴Ke isa Sipi Gauga fou akeifani kai, Sipi Gauga ke isa eifani'i au'i, ke ekinani'i, ke alo'i ko'agai isa muninai kepea au'i isafa fou isa akepalutini'i. Gome Sipi Gauga auga lopia ma'oai e'i Lopia, ke kin ma'oai e'i Kin," eoma.

¹⁵Ke agelo lau epainiau pugu einaka, "Peage lapau papiega fei laa'lai eagu loisa auga, agofa'a ma'oai papiau'i, ago ma'oai papiau'i, la'afou i'oi'i i'oi'i papiau'i, mala i'oina i'oina papiau'i fou'i eifani'i. ¹⁶Ke ifeni koa i'opoga auga, ke pa'o ou'aga fou peage lapau papiega ega'ina alo'i ko'agai anina afakeani. Isa papie ega'ina eegai kapa ma'loai kekae au'i akeafania, ke faaga maini akepu'a fuga ageagu. Ke isa papie ega'ina pitioga akeania, ke loai akeuma. ¹⁷Gome Deo kapal'ina fekapa eoma auga isa alo'lai eogeisa, ke isa alo'i aga'omo emia, e'i isapu aagoai ifeni koa i'opoga ega'ina kepenia. Ke ifeni koa i'opoga ega'ina, isapu ega'ina ageafia mo agelao Deo ega iifa ma'oai ko'al'i akemia kinagai kai. ¹⁸Ke papie oi loisa auga, taoni akaiki'a aagoa kini'i e'ima'i auga.

Babilon Ago Akaiki'a E'ualai Auga Fouga

18 ¹Ega'ina afegai lau agelo i'oina aga'o ufae eake emai laisa. Isa isapu akaiki'a eafia, ke ega'ina isapugai ega eaea akaiki'a ipauma aagoa fofouga epaeaea. ²Ke isa aina akaiki'agai eagaga einaka:

“Babilon,
ago akaiki'a auga e'ualai efua, e'ualai efua!
Isa auga tiapolo e'i pagua,
ke spiritu apala'i ma'oai
e'i aguagu afuga emia.

Ke inei ofu'i, ke Deo maagai apala'i ipauma'i au'i afu'i emia.
³Gome ago ma'oai papiau'i
isa fou amage koa lao'i mai'i apala'i
fekekapa'i auga fino keinu.

Ke aagoa kini'l'i isa fou amage koa lao'i mai'i kekapai'i.
 Ke isa kapa felo'i ipauma'i ma'oai eegai fekeka isapuga eafia auga
faagagai,
aagoai afa'afa au'i kepa'amu'amu," eoma.

⁴Egae kai lau aufalao i'oina aga'o aina ufafai emai iina eifa oma aina
lalogonia:

“E'u papiau, isa eegai amopealai,
ega koa oi isa fou laomai apala'i folokapa'i.
Ke isa kapa apala'i feafi'i auga
oi fou kaimialao foloafi'i.

⁵Gome isa ega laomai apala'i au'i kegoai'i e'agaukae elao ufa.
 Ke Deo isa ega laomai apala'i eopolani'i.
⁶Isa kapa'ina epipeni auga amopenimue.
 Ke kapa'ina isa oi eemai ekapai'i auga,
 afa ipeninai ekapaisa auga aga'omo laagai foogeaua fopenimue.
 Ke isa ega kaputi alogai kapa'ina eoge lapuinia auga,
 laagai gua mopamia mooge lapuinia.

⁷Ke isa ifo epa'amu'amu alogaina, ke ifo au akaiki'a epamia koa i'opoga,
 oi isa ega mopakiekie oma,
 ke alo isafa ega mopamafu oma.

Some isa gua alogai ifo eifa einaka,
 ‘Lau kuini koa laague, ke lau alaafuafu, ke lau afalaapeapepe,’ eoma.
⁸Ega puo kapa apala'i, mae, apepe ke magea isa feafi'i au'i ma'oai,
 kina aga'omo alogai akemai ageafi'i.

Ke isa loai ageaga, gome Lopia Deo kapula gome auga,
 isa ega laomai apala auga afa agepenia.

⁹“Ke aagoa kini'l'i isa fou amage koa lao'i mai'i kekapai'i au'i, ke isa
 kapa felo'i ipauma'i eegai epa'amu'amu alogaina auga kapa'i fou kai'ialao
 keafi'i au'i, isa loai eaga auga akuga akeisa. Ega aisama isa puogai
 akepinapina, akeapepe alogaina. ¹⁰Ke kin ega'ina au'i isa ega kiekie
 akaiki'a ipauma akeisa akemani'i puogai, aakai mo akeapa kai, akeapepe
 akeinaka:

“O Babilon ago akaiki'a aumu,

Deo eegai afa apala ipauma loafia! Deo eegai afa apala ipauma loafia!

O isapu akaiki'a ago aumu,

Kina maaga aga'omo alogai oi emu laomai apala afa Deo epenio auga
loafia efua!" keoma.

¹¹ Ke aagoai afa'afa au'i isa puogai akepinapina, ke akeapepe alogaina, gome kai aga'o isa e'i amu afae'afa'i pugu. ¹² Amu ega'ina au'i auga gold, silifa, ke kepo kimage'i felo'i afa'i akaiki'a'i i'oi'i i'oi'i au'i, ke pearl, ke linen tiapuga felo ipauma, ke tiapu umuga eaea, ke tiapu silikaga, ke tiapu pitoga koa i'opoga auga, ke au felo'i ipauma'i i'oi'i i'oi'i au'i. Ke a'o akaiki'a'i pa'o'iai kapa i'oi'i i'oi'i kekapa'i au'i, au afa'i akaiki'a'i au'i. Ke kopa, auli, ke kepo kimagega auga. ¹³ Ke au aka cinnamon faaga, ke aupu gagau'i ke'isapu au'i. Ke mulamula foga'i felo'i i'oi'i i'oi'i au'i. Ke olii papiau faaga'i kepakuma au'i. Ke fino, au aka olive oilina. Ke palafa kepaikumu'a auga, ke palafa anina akepaikumu'a auga. Ke polomakau, sipi, oti, ke pulieta, ke papiau imaa'u'i, ke papiau lalau'i.

¹⁴ "Ke afa'afa au'i Babilon ago akepaina akeinaka, 'Oi au anina loisa lomaaga auga oi epua'afunio elao. Ke oi emu pa'amu'amu amu'i, ke emu eaea akaiki'a auga fou eemuai laa'i kemia. Ke ega'ina kapa'i auga papiau afakeisa'l pugu,' keoma. ¹⁵ Ke afa'afa au'i ega'ina amu'i ke'afa'afalaini'i, ke isa faagagai kepa'amu'amu au'i aakai akeapa, isa ekiekie alogaina auga akeisa akemani'i alogaina. Ke akepinapina, ke akeapepe. ¹⁶ Ke akeifa akeinaka:

"O ago akaiki'a,

linen tiapuga felo ipauma pitoga,

ke pitoga koa i'opoga loi'iuka,

ke gold, silifa, ke kepo afa'i akaiki'a'i i'oi'i i'oi'i
lokaikai aumu!

Deo oi afa apala epeniio efua!

Deo oi afa apala epeniio efua!

¹⁷ Gome emu pa'amu'amu akaiki'a ega'ina auga,

kina maaga aga'omo alogai keauoka afe'aini'i!" keoma.

Ke ufai aufalao aga'o aina lalogo auga eifa pugu einaka, "Lonti ke'ima'i lopia'i ma'oai, ke lontiai kelao kemai au'i ma'oai, ke lontiai kepinauga au'i, ke papiau i'oi'i isa'i a'uai e'i fo'ama keafia keania au'i ma'oai aakai akeapa. ¹⁸ Ke maa'i agelao taoni akaiki'a ega'ina eaga akuga akeisa aisama akeifa akeinaka, 'Taoni aga'o ega akaiki'a i'ina taonina koa i'opoga laa'i,' akeoma. ¹⁹ Ke isa alo'i agemafu alogaina, aeapu akeafia kania'iai akeoge, ke akepinapina akeapepe akeinaka:

"O taoni akaiki'a,

papiau ma'oai e'i lonti a'uai ekae au'i,

isa eegai pa'amu'amu akaiki'a ekae auga

eegai keafia kepa'amu'amu!

Deo isa afa apala epeniia efua!

Deo isa afa apala epeniia efua!

Gome pa'amu'amu akaiki'a ega'ina auga,
kina maaga aga'omo alogai keauoka afe'aini'i!

²⁰Kai ufa, Deo ega papiau aumi, apostolo,
ke profeta aumi isa amoalogamalaina.

Gome isa oi faagamiai kapa'ina ekapai'i koa i'opoga mo, Deo isa ega
laomai apala afa epeniia," akeoma.

²¹Ke agelo aga'o ekapula alogaina auga, kepo aga'o fo'ama
kepaikumu'a kepo akaiki'a koa i'opoga auga eafiakae a'uai epiulaisa, ke
eifa einaka:

“Ega koa i'opoga mo,
Babilon taonina akaiki'a auga fiakoa mo
akeafia akepiulaisa, ke afakeisa pugu.

²²Ke harp kepa'opunia a'o,
iifi kepagama au'i a'o'i, ineine keipina a'o'i,
ke fi'i keipina au'i a'o'i
oi alomuai afakelogoni'i pugu.
Ke oi alomuai papiau ima'iai
pinauga i'oi'i i'oi'i kekapa'i au'i,
aga'omo ganinagai, afakeisa'i pugu.

Ke papiau kepo akaiki'agai fo'ama kepaikumu'a auga
a'o afakelogo pugu.

²³Ke lanepa eaea auga oi alomuai afaeeaea pugu.

Ke amage mamaga auga, ke ifiao ageakafania auga fou e'i miamia kekapa
au'i,
aina'i oi alomuai afakelogoni'i pugu.

Ke oi emu afa'afa au'i, agofa'ai au akaiki'a'i.

Kai oi emu ugauga isapugai ago ma'oai lofoge'i'i.

²⁴Ke profeta, ke Deo ega papiau, ke aagoai papiau i'oi'i ma'oai
oi loaupugu'i au'i ifa'i oi alomuai kekapulaisa," eoma.

Deo Amaau Afagaina!

19 ¹Ega'ina afgai lau ufa a'oa'o akaiki'a ipauma, papiau ealogai
alogaina keifi koa i'opoga aina'i lalagonia. Isa keifi keinaka:
“Deo amaau afagaina!

Papiau kania'i isagamauga auga,
ke eaea akaiki'a,
ke isapu akaiki'a auga
i'a a'a Deo apuga.

²Ke Isa papiau e'i laomai felo, o apala afa epipeni auga,
ko'a ke opaina auga mo ekapa.

Gome Isa peage lapau papiega apala ipauma,
amage koa lao'i mai'iai aagoa epalifua auga
afa apala epeniia.

Isa ega pinauga au'i ifa'i efaka afa isa epeniia," keoma.

³Ke keifi pugu keinaka:

"Deo amaaau afagaina!

Isa eaga akuga e'agaukae aefuafua," keoma.

⁴Ke au akaiki'a'i au'i 24 ufai keague au'i, ke pagama kapa'i maa'i maunina au'i pani fou Deo ega aguagu afugai eague auga agogai keomukipo keau afagaina. Ke keifi keinaka:

"Amen! Deo amaaau afagaina!" keoma.

⁵Ke Deo eaguagu afugai aufalao aga'o aina epealai emai eifa einaka:

"Oi Deo ega pinauga aumi ma'oai,
isa omani'laina aumi, e'elemi,
ke akaiki'ami aumi ma'oai
i'a a'a Deo amoifagaina!" eoma.

⁶Ke lau a'oa'o akaiki'a ipauma, papiau ealogai alogaina koa keifi aina'lalogonia. Ke fei epiau fa'il'i fopai eauga a'o akaiki'a emia auga a'o lalogonia. Ke ufa eauga a'o akaiki'a emia auga koa i'opoga a'o lalogonia. Isa keifi keinaka:

"Deo gaisau afagai!

Gome i'a a'a Lopia Deo, kapa ma'oai agekapa'i agekaina Auga,
kapa ma'oai e'ima'i.

⁷I'a amaalogama, alo'a gagama alogaina, Isa au akaiki'a amapamia!

Gome Sipi Gauga ega amage kina emai efua,
ke ifiao isa feakafania eoma auga ifo efua eague.

⁸Ke isa linen tiapu'i felo'i ipauma'i, kekimage ke aiofu'i au'i kepeniia ei'iuka'i," keoma.

(Linen tiapu'i ega'ina au'i auga, Deo ega papiau alo opai lao'i mai'i kekapa'i au'i fouga eifania.)

⁹Egae kai agelo lau epainiau einaka, "Papiau kapa'i Sipi Gauga ega amagelofe miamia gapigapi fo'amaga fekeania eoma eifa koko'i au'i, Deo eegai kapa felo'i keafia auga fouga mopapua," eoma. Ke eifa pugu einaka, "I'ina auga Deo ega iifa ko'al'i au'i," eoma.

¹⁰Ega aisama lau isa ife fo'inai laomukipo maau afagaina laoma. Kai isa lau epainiau einaka, "Moisa! Ega'ina folokapa! Lau auga pinauga au aga'o, oi ke aamu akimu Iesu fouga ko'a mo oifafoua aumi koa i'opou. Oi Deo moau afagaina! Gome Iesu fouga ko'a mo auga Deo ega Spirituai profeta eifania auga.

Oti Keloga Laagai Eaguka Auga

¹¹Egae kai lau ufa eagalai laisa. Ke moisa egae oti keloga, ke oti laagai eaguka auga kepafaala 'Alo ko'agai, ke iifa ko'agai Deo muninai epea

keoma auga' laisa. Isa alo opainai kapa'ina felo, o kapa'ina apala auga fouga eifania, ke eifani. ¹²Ke isa maaga alo auga lo eufa koa i'opoga emia. Ke isa kania laagai auga kin kaniagai kraon eoge auga ma'o eoge'i'i. Ke isa faagagai aka aga'l o kepapua, ke aka ega'ina auga kai aga'l aelogo kai isa ifogamo mo elogo. ¹³Ke isa afe tiapuga ifai kei'iupia auga ei'iuka, ke isa aka auga Deo ega Iifa. ¹⁴Ke ufaifani au'l linen tiapu'i felo'i ipauma'i kelo'i, ke aiofu'i kei'iuka'i au'i oti kelo'i laa'iai keaguka, isa muninai kepea. ¹⁵Isa akegai ifani a'ifaga eako alogaina auga epealai. Ke isa ega'ina aifagai aagoa papiau'i feaga'i eoma. Ke isa isapu aulinai ega'ina papiau'i age'ima'i. Isa Deo kapa ma'oai agekapa'i agekaina Auga, ega guakupu akaiki'a ipauma, fino koa i'opoga auga, fino ikapa afugai agegafamu'a, agefakalai. ¹⁶Ke afe tiapugai, ke a'agagai isa aka iina kepapua oma:

KIN MA'OAI E'I KIN, KE LOPIA MA'OAI E'I LOPIA.

¹⁷Egae kai maau elao aisama, agelo kina alogai eapa laisa. Isa aina akaiki'agai ufa guagai inei kegopo au'i ma'oai eagaga peni'i einaka, "Amomai, Deo ega gapigapi fo'amaga akaiki'a auga puogai amokaigugu. ¹⁸Ega koa oi kin, ifani lopia'i, kapula au'i, oti, ke oti laagai keaguka au'i, ke papiau i'oi'l ma'oai, keagu aage mo au'i, ke kala'afi au'i, ke au e'ele'i ke akaiki'a'i au'i ma'oai pitio'i foani'i," eoma.

¹⁹Ke lau ifeni koa i'opoga, ke aagoa kini'i, ke e'i ifani au'i fou kekaigugu, oti laagai eaguka auga ega ifani au'i fou kegaifani keoma laisa'i. ²⁰Kai ifeni koa i'opoga auga keafilia, ke profeta pifoge gou akaiki'a'i ekapa'i auga isafa isa fou keafii'i. Isa gou akaiki'a'i ekapai'i papiau ifeni koa i'opoga ega maka keafia, ke papiau ifeni koa i'opoga auga iisa kekapa auga keau afagaina au'i efoge'i'i. Ifeni koa i'opoga ke profeta pifoge auga auni'i keafii'i maa'i maunina mo, mulamula isapuga ipauma laofaga auga ofugaga akaiki'a alogai kepiulai'i. ²¹Ke isa muni'i'ai kepea au'i ma'oai oti laagai eaguka auga akegai ifani a'ifaga epealai auga a'ifagai eaupugui'i. Ke inei ma'oai kemai isa pitio'i keanipugu.

Inipo 1000

20 ¹Egae kai lau agelo aga'o, Abis pa'afina fepaagalaisa isapuga eafia, ke imagai tieini akaiki'a ipauma eafia auga ufaifani eake emai laisa. ²Eake aisama tiapolo, o Satani kaapa mai'ife maipanina, ufainagai eagu auga kaapaga eafia egopeisa inipo 1000 feagu eoma. ³Ke eafia Abis alogai e'afolaisa, ke pa'afina efau apua, ega koa agofa'a papiau'i faefoge'i mo felao inipo 1000 feafia kinagai kai eoma. Ega'ina afegai isa fekepapealaisa afa'agamo mo feagu.

⁴Ke lau Deo eaguagu afuga laisa aisama, ega eafia isapuga eafia papiau e'i laomai felo, o apala afa fekepeni'i keoma au'i laisa'i. Ke papiau Iesu fouga ko'a keifafoua auga puogai, ke Deo ega iifa puogai also'i

kefoua au'i lalau'i laisa. Ega'ina papiau'i auga ifeni koa i'opoga auga, o isa iisa i'opoga mo kekapa auga akeau afagaina, ke ega maka paku'iai o ima'iai akeoge au'i. Isa kemaunimue ke Iesu Kristo fou inipo 1000 kapa ma'oai ke'imai'i.⁵ Ega'ina auga maeai maunimue eufai auga. (Kai papiau isa'i kemae au'i auga, akemaunimue mo elao inipo 1000 efua afegai kai.)⁶ Kai papiau kapa'i maeai maunimue eufai auga alogai kemaunimue au'i, Deo eegai kapa felo'i keafi'i ke alo'i elolofa au'i. Ke mae gua auga isapuga isa ae'ima'i. Kai isa Deo, ke Iesu Kristo fou e'i sakedote au'i akemia, ke isa fou inipo 1000 kapa ma'oai ake'ima'i.

Satani Ega Kina Fua

⁷Ke inipo 1000 agepagai afegai aisama, Satani ega tipula afugai akepapealaisa. ⁸Ke isa agepealai agelao aagoa kiuga paniai, ago ma'oai kepafaala'i Kok, ke Makok keoma au'i papiau'i agefoge'i, ega koa agepakai guguaini'i ifani kegalao ageoma. Ke ega'ina papiau'i auga, au'i ma'oai mo a'uai figu kekae au'i koa i'opoga. ⁹Isa aagoa fofouga alogai kepea pagai Deo ega papiau keagu afuga, Deo taoni alo ko'agai anina eani auga taonina keapa lofe. Kai ufai lo eake emai eumai'i ekogopi'i. ¹⁰Ke Satani papiau efoge'i auga keafia ifeni koa i'opoga, ke profeta pifoge fou, mulamula laofaga isapuga ipauma ofugaga alogai kepiulai'i afugai kepiulaisa. Egae gapi gani faaga'i agekiekie aoniamo.

Papiau E'i Laomai Felo O Apala Afa Akeafia Kina Fua Auga

¹¹Egae kai lau Deo ega aguagu afuga akaiki'a ipauma kelogai Isa egae eagu laisa. Ke aagoa ufa fou Isa agogai kepealai, ke isa afu'i laa'i emia. ¹²Ke lau papiau ma'oai, au akaiki'a'i ke e'ele'i au'i kemae au'i Isa ega aguagu afuga agogai keapa, ke Isa agogai puka keega keka laisai'i. Ke puka i'oina aga'o isafa kepaega eka. Ega'ina puka auga papiau agu pagai maunina fepeni'i auga puka. Ke kemae au'i auga isa kapa'ina kekapai'i au'i fou'i pukai kepapua'i koa i'opoga mo, afa ega koa keafia. ¹³Ke a'u, papiau kemae egae alogai keagu au'i epapealai'i. Ke mae au'i Ipeliai keagu au'i epapealai'i. Ke papiau aga'o aga'o kapa'ina kekapaisa auga kainai mo afa akeafia. ¹⁴Ke mae Hades fou auga keafii'i lo ofugaga akaiki'a alogai kepiulai'i. Ke lo ofugaga akaiki'a egal'ina auga, mae gua auga fouga eifania. ¹⁵Ke aufalao aga'o aka Deo papiau agu pagai maunina fekeafia eoma pukagai laa'i auga, keafia lo ofugaga akaiki'a alogai kepiulaisa.

Ufai Ierusaleme Taonina Mamaga

21 ¹Egae kai lau maau elao aisama, ufa mamaga, ke aagoa isafa mamaga auga laisa. Gome ufa eufai auga, ke aagoa eufai auga fou laa'i kemia, ke a'u isafa laa'i. ²Ke lau, Ierusaleme taonina

mamaga, Deo ega Taoni ufaei Deo eegai eake emai auga laisa. Isa auga, ifiao isa akafa ageakafania auga faugai ekaikai felo alogaina auga koa i'opoga ekaikai eake emai laisa. ³Ke lau Deo ega aguagu afugai aufalao aga'o aina akaiki'agai iina eifa oma aina lalogonia, "Moisa, Deo ega pagua auga pau eake papiau e'i pagua emia. Ke Isa papiau fou akeagu. Papiau ega'ina Isa ega papiau akemia, ke Deo ifo auga isa fou akemia, ke Isa e'i Deo agemia. ⁴Deo isa maa'l iuga ma'oai agefaina. Ke mae, pinapina, apepe, ke kiekie fou laa'l akemia. Gome kapa ufa'i ma'oai kepagai efua," eoma.

⁵Ke Deo ega aguagu afugai eagu auga eifa einaka, "Lau kapa ma'oai mama'i lakapa'l!" eoma. Ke eifa pugu einaka, "Ke i'ina iifa'i mopapua'i, gome i'ina iifa'i ko'a'i ipauma'i, ke fopako'ani'i auga ekainia," eoma.

⁶Ke Isa lau epainiau pugu einaka, "Kapa ma'oai lakapai'i efua. Lau Alfa, ke Omeka. La'ina, ke Fua au. Kaisau also ekupu auga, lau isa fei gome mauni mamaga epipeni auga feina, afa laa'i, alapeni aagenia mo ageinu. ⁷Kaisau ega pako'ai laomai apala'i agepalutini'i auga, i'ina kapa'i ma'oai alapenia. Lau isa ega Deo alamia, ke isa Lau gau agemia. ⁸Kai kemani'i au'i, pako'a laa'i au'i, Deo gua kepakupua au'i, auau au'i, amage koa lao'i mai'i kekapa'i au'i, ugauga au'i, deo pifoge'i keau afagaini'i au'i, ke pifoge au'i ma'oai auga afu'i, mulamula laofaga isapuga ipauma ofugaga akaiki'a auga," eoma.

⁹Egae kai agelo imagea gua liti imagea gua alo'iai kapa apala'i imagea gua fuagai kefopolaisa au'i aga'o emai lau epainiau einaka, "Mai, lau oi Sipi Gauga ifiao ageakafania, akafa agemia auga alapakinaiso," eoma. ¹⁰Ke isa lau Deo ega Spiritu isapugai eafiau elaoainiau iku akaiki'agai, au'oniai ke Ierusalem taonina, Deo ega taoni, ufaei Deo eegai eake emai auga epakinaisau. ¹¹Ke taoni ega'ina auga Deo ega eaea akaiki'a ipauma eafia, ke ega kimage auga, kepo aga'o afa akaiki'a ipauma aka jasper koa i'opoga ekimage alogaina, ke faagagai ofu aga'o laa'i, kepo aga'o kalati koa i'opoga, agaisa pagainia auga aka crystal koa i'opoga. ¹²Ke ega'ina taonina pou akaiki'a e'agau alogaina auga eapa lofe. Ke pouai pa'afi ma'oai 12 keka. Ke agelo 12 pa'afi ega'inagai keapa. Ke pa'afi ega'ina laa'iai Israel ikupu'i 12 aka'i kepapua. ¹³Ke kina e'agaukae afuga, East kaina pa'afi oiso keka. Ke North kaina pa'afi oiso keka. Ke South kaina pa'afi oiso keka. Ke kina eake afuga, West kaina isafa pa'afi oiso keka. ¹⁴Ke pou papagai auga uu'u koa i'opoga, kepo 12 faaga'iai pou kekapaisa. Ke kepo ega'ina faaga'iai, Sipi Gauga ega apostolo 12 aka'i kepapua'i.

¹⁵Ke agelo lau maauai enini'ani auga amu i'opo'i kapa goldai kekapa auga eafia, Ierusalem taoni ega'ina, ke pa'afina, ke pouga fou ga'opo'i eoma. ¹⁶Ke taoni ega'ina ega maefia, ke uufa fou auga i'opo'i mo. Ke apie apie fou i'opo'i koa i'opoga, ega maefia isafa fou i'opo'i mo. Agelo ega'ina i'opo augai taoni e'opoisa, ke ega maefia auga 2200 kilomita, uufa isafa

ega koa i'opoga, ke ega maefa au'oni elao auga isafa ega koa i'opoga. ¹⁷Ke agelo i'opo epapinauga auga i'opogai pou e'opoisa, ke papiau aumauni e'i i'opoai e'opoisa aisama, pou ega maefa au'oni elao auga 65 mita. ¹⁸Ke pou ega'ina auga kepo afa akaiki'a aka jasper kekapaisa. Ke taoni ifo auga gold ipaumagai kekapaisa, ke iisa auga kalati aeofu auga koa i'opoga. ¹⁹Ke taoni pouga papagai uu'u koa i'opoga kepo'i auga, kepo afa'i akaiki'a'i i'oi'i i'oi'laii kepakaikai'i. Ke kepo uu'u'i afa'i akaiki'a ega'ina au'i auga aka'i inamo'e; kepo eufai auga aka jasper, ke gua auga aka sapphire. Ke oiso auga aka chalcedony; ke pani auga aka emerald. ²⁰Ke ima auga aka sardonyx; ke imagea aga'omo auga aka sardus; ke imagea gua auga aka chrysolite; ke imagea oiso auga aka beryl; ke imagea pani auga aka topaz; ke ou'aga auga aka chrysoprase; ke ou'aga kuagai aga'omo auga aka jacinth; ke ou'aga kuagai gua auga aka amethyst. ²¹Ke taoni pa'afil'i au'i isafa kepo afa akaiki'a aka pearl keafili'i kekapai'i. Ke pa'afi aga'o aga'o auga pearl aga'omogai kekapaisa. Ke taoni keagaga auga gold ipaumagai kekapaisa kai, iisa auga kalati aisa pagainia koa i'opoga.

²²Kai taoni alogai Deo ega e'a alaisa, gome Lopia Deo kapa ma'oai agekapal'i agekaina, ke Sipi Gauga fou auga Deo ega e'a. ²³Ke kina taoni ega'ina laagai afaeaga, ke gafa isafa taoni ega'ina laagai afaepoa. Gome Deo ega eaea akaiki'a auga taoni ega'ina epaeaea. Ke Sipi Gauga auga taoni ega'ina lanepaga emia. ²⁴Ago ma'oai taoni ega'ina eaeagai akepea. Ke aagoa kini'i ma'oai kapa felo'i ee'iai kekae au'i akemaiseini'i ega'ina taoninai. ²⁵Ke kina aga'omo alogai ganinagai, taoni pa'afil'i ega'ina afakekupukupuni'i. Gome egae afaegapigapi. ²⁶Ke ago ma'oai e'i kapa felo'i, ke e'i akaiki'a ma'oai akemaiseini'i egae. ²⁷Kai ofu kapa'l'i aga'omo ganinagai, ega'ina taonina alogai afaekoko. Ke kaisau Deo gua kepakupua kapa'l'i ekapa'i auga, ke epifoge auga isafa ega'ina taoninai afaekoko. Kai kaisau aka'i Sipi Gauga mauni epipeni auga pukagai kekapua au'i mo egae akekoko.

Mauni Agapuge

22 ¹Ke agelo ega'ina lau agapuge mauni epipeni auga feina epakinaisau. Ke fei ega'ina auga kepo afa akaiki'a aka crystal koa i'opoga emalolo alogaina, ke Deo ke Sipi Gauga fou e'i aguagu afugai ekipolai elao. ²Ke eake emai taoni keagaga ipuaina ipaumagai epiau. Ke agapuge ega'ina apie apie auga au mauni keipeni au'i keapa. Ke au ega'ina au'i auga anil'i ou'aga kuagai gua keoge'i. Ke aua gafai auga anil'i aga'o aga'o keoge'i. Ke au ega'ina gagau'i auga ago fekepafelo'i au'i. ³Ke kapa aga'o keifa apala penia auga ega'ina taonina alogai afaeka. Ke Deo ke Sipi Gauga fou e'i aguagu afu'i auga taoni alogai akeka. Ke Isa ega pinauga au'i isa ega pinauga akekapa. ⁴Ke pinauga au'i ega'ina Deo kua

maaga akeisa, ke aka isa paku'iai ageka. ⁵Ke egae afaegapigapi pugu. Ke isa lanepa eaea, o kina eaea fekeafia auga afaekaina. Gome Lopia Deo isa eaea agepeni'i. Ke isa kapa ma'oai ake'ima'i aoniamo.

⁶Ke agelo ega'ina lau epainiau pugu einaka, "Lopia Deo ega Spiritu profeta epenii'i auga, ega agelo eulaisa kapal'ina afa'agamo fekemia auga, isa ega pinauga au'i epakina'i. Ega kainai i'ina iifa'i au'i ko'a'i ipauma'i, ke oi i'ina iifa'i fopako'ani'i auga ekainia," eoma.

Iesu Emai Pugu

⁷Ke Iesu lau epainiau einaka, "Moisa, lau afa'agamo alafai! Kaisau i'ina pukagai Deo ega iifa profeta koa i'opoga iifafouga emia, kepapua'i au'i muni'lai epea auga, Deo eegai kapa felo'i eafi'i," eoma.

⁸Lau Ioane, ega'ina kapa'i a'o'i lalogonia, ke laisa'i. Ke lau ega'ina kapa'i au'oniai au'i ma'oai a'o'i lalogonia aisama, agelo ega'ina kapa ega'ina ma'oai lau epakinaisau auga ife fo'inai laomukipo maau afagaina laoma. ⁹Kai isa lau epainiau einaka, "Ega'ina folokapa! Lau isafa oi, ke oi aamu akimu profeta au'i, ke i'ina pukagai iifa ma'oai kekae au'i muni'lai kepea au'i ma'oai koa i'opo'i, Deo ega pinauga ikapa au. Ega kainai Deo moau afagaina!" eoma.

¹⁰Ke epainiau pugu einaka, "I'ina pukagai Deo ega iifa profeta koa iifafouga emia auga, puka ipaafiapina kapagai folopaaifiapia, gome kina emai kainagai. ¹¹Kaisau laomai apala ekapa auga pua'afuga gakapa. Ke kaisau alo feofu kapa'i ekapa'i auga, mopua'afuga gakapa'i. Ke kaisau Deo maagai alo opai lao'i mai'i ekapa'i auga, mopua'afuga gakapa'i. Ke kaisau alo elolofa auga, mopua'afuga alo galolofa," eoma.

¹²Ke Iesu eifa pugu einaka, "Moisa, lau afa'agamo alafai! Ke afa fapipeni auga kapa'i lau eeuai kekae. Ke lau papiau aga'o aga'o kapa'ina kekapaisa auga kainai mo afa alapeni'i. ¹³Lau Alfa, ke Omeka. Ufaimaaga, ke La'ina au, ke Muniai Ipauma, ke Fua au.

¹⁴Ke kaisau e'i tiapu keikua koa i'opoga e'i laomai felo au'i, Deo eegai kapa felo'i akeafil'i. Ega koa isa au mauni epipeni auga anina fekeania isapuga akeafia. Ke isa Ierusalem taonina mamaga auga pa'afinai fekekoko auga isapuga fekeafia laoma. ¹⁵Kai papiau ugauga kekapa au'i, amage koa lao'i mai'i kekapa'i au'i, auau au'i, deo pifoge'i keau afagaini'i au'i, ke pifoge anina keani ke kekapa'i au'i ma'oai auga taoni ega'ina afegai keague. Ega'ina papiau'i auga amu'e koa i'opo'i. ¹⁶Lau, Iesu e'u agelo laulaisa, iifi e'a fau'iai ega'ina iifaga ko'a ipauma auga feifafoua laoma. Ke lau auga Mesaia, Davide okogai lamai au akaiki'au au, ke Davide akagai lamai au. Ke lau auga amagai milimi'ina eeaea alogaina au," eoma.

¹⁷Ke Deo ega Spiritu, ke ifiao Sipi Gauga ageakafania auga fou keifa keinaka, "Mai," keoma. Ke kaisau aina epaaua isa aina'i elogo auga feifa,

“Mai,” feoma. Ke kaisau also ekupu auga femai. Ke kaisau anina eani auga, femai fei mauni epipeni auga afa laa'i, feafi aagenia mo.

¹⁸Lau papiau ma'oai Deo ega iifa i'ina pukagai profeta koa i'opoga iifafouga emia a'o kelogo au'i ma'oai aina'i iina lapalogo oma: Aufalao aga'o i'ina iifa'i laagai iifa i'oina aga'o ageogeaua koa aisama, i'ina pukagai kapa apala'i fou'i kepapua'i au'i, Deo ega'ina kapa'i apala'i laagai ageogeaua. ¹⁹Ke aufalao aga'o i'ina pukagai Deo ega iifa profeta koa i'opoga iifafouga emia auga aga'o ageafilaisa koa aisama, i'ina pukagai kapa'ina kepapua'i au'i, Deo ega taonai au mauni epipeni auga faagagai kapa'ina isa apuga feafia eoma auga ageafania.

²⁰Ke ega'ina kapa'i ma'oai ko'a'i mo auga eifafoua auga eifa einaka, “E, lau afa'agamo alafai,” eoma.

Amen. Lopia Iesu, mai.

²¹Lau lamegamega ega koa Lopia Iesu ega gafegafe Deo ega papiau ee'iai feka laoma. Amen.